





390921

Mag. St. Dr. 

390921

I

74.
4
6
9.

R
J
Pr
C
y

RUDIMENTA
GEOGRAPHICA,
S I V E

Brevis, facilisque
METHODUS
Juventutem Orthodoxam
Notitiâ Historicâ
imbuendi, ¹

Pro Gymnasiis Societatis JESU,
Authore

Ejusdem Societatis Sacerdote.

OPUSCULUM QUINTUM

L U B L I N I

Typis Collegii S. R. M. Societatis JESU,
Annô Domini 1761.

PRÆFATIO.

Cum Geographia alter Historiæ sit oculus, nec parum lucis afferat Pœsi, quintum hoc Opusculum Geographicum eorum potissimum usus destinandum censuimus, qui in Gymnasiis nostris quartæ Classi sunt adscripti, ac proinde Historiæ simul ac Pœticæ peculiarem dant operam. Equidem haud desunt, hoc præsertim tam erudito saculo, Libri & Institutiones Geographicæ omnibus sanè numeris absolutæ. Verùm ob id ipsam ad tyronum captum minùs sunt accommodatæ. In prima tamen Opusculi hujus parte Quæstiones quasdam Mathematicas de Geographiâ præmittendas duximus, non ut in iis enodandis accuratiusque excoutiendis multum laboris ac temporis ponant Discipuli, sed ut rudi saltem rerum istoriarum notitia imbuti, quæ in altera ejusdem Opusculi parte proponuntur, faciliùs possint comprehendere. Plurima porò hic præmittuntur, quæ alii Geographi fusè recensent, ne Pœseos tyrones, pluribus alioquin occupationibus scholasticis distenti, nimis rerum mole obruantur. Unde quod aliàs semel atque iterum præfati sumus, hic denuò jurat repetere, nimirum Opuscula hæc nostra omnia nisi Rudimenta ac Progymnasmata quedam esse, quibus Juventutem nostram Gymnasticam ad decretiore Academia certamina præparamus atque instruimus.



RUDIMENTA GEOGRAPHICA.

PARS I.

De Globo.

CAPUT I.

De Globo ejusque partibus generatim.

1. Quid est Geographia?

Geographia à terra & scribo nomen trahens
descriptio terræ est.

2. Ecquod Geographiam inter & Cosmogra-
phiam discrimen?

Cosmographia non terram tantum, sed mun-
dum hunc aspectabilem universum, quidquid
nempe cæli terræque ambitu continetur, de-
scribit.

3. Quid est Sphæra armillarum?

Instrumentum est mathematicum ex variis cir-
culis, armillarum instar artificiosè inter se in-
flexis, coagmentatum, cælum simul, terram-
que referens.

A2

4. Quid

4. *Quid est Globus artificialis?*

Est effigies quædam Globi naturalis, seu terrestris, seu siderei.

5. *Quot circuli primarii in Sphæra æquæ ac Globo utroque numerantur?*

Decem; sex nempe maximi sive majores & quatuor minores.

6. *Quinam majores sex?*

Æquator, Horizon, Meridianus, Zodiacus, Colurus Equinoctialis & Colurus Solstitialis; qui duo tamen ad institutum nostrum minus sunt scitu necessarii. Omnes hi circuli dividunt Globum in duas partes æquales.

7. *Quinam minores quatuor?*

Duo Tropici, & totidem Polares, qui Globum in duas secant partes inæquales.

8. *Quot gradus circulus quivis complectitur?*
Trecentos & sexaginta.

9. *Quid quadrans est? quid semicirculus & Hemisphærium?*

Quadrans quarta circuli pars est. Semicirculus sive Hemicyclus est circulus dimidiatus. Hemisphærium autem dimidium Sphære.

10. *Quid est centrum?*

Est punctum in Sphæra aut circulo medium, à quo omnes lineæ ad peripheriam ductæ sunt æquales.

11. *Quid est Diameter? Quid Semidiameter?*

Diameter à metior; est recta quæcunque lineæ per



per centrum ducta, & in utraque circuli superfacie terminata, cujus dimidium dicitur Semidiameter.

12. *Quid sunt lineæ & circuli paralleli?*

Qui æquali undique spatio abs se invicem distant.

13. *Quot sunt circuli paralleli in globo?*

Quamquam plurimi hujusmodi circuli describi possint; ad confusionem tamen vitandam octoni ab Æquatore ad Polum Arcticum toridemque ad Antarcticum per denos quosque Meridiani gradus duci solent, ut gradus eorum distinctius numerari, indeque terræ latitudo dignosci possit.

14. *Cur Globi figura rotunda est?*

Quia terra, quam representat, pariter rotunda est.

15. *Unde verò constat, terram esse rotundam?*

Ex eclipsibus præcipuè Lunaribus, ubi terra umbram rotundam projicit in Lunam, id quod fieri haud posset, nisi terra pariter rotunda esset.

16. *Cur montes præalti nil obstant terræ rotunditati?*

Quia hi, cum toto terrarum orbe comparati, sunt instar arenularum, Globo adhaerentium.

17. *Quid sunt Poli & Axis mundi?*

Cum corpora caelestia mota continuo & velocissimo ab Oriente in Occidentem quatuor & viginti horarum spatio circumagantur, necessarium meridiem ac septentrionem versus duo debent esse puncta immobilia, in quibus tanquam

cardinibus cœli machina circumvolvatur. Hæc puncta sive cardines vocantur Poli à verbo. Linea porro ab uno Polo ad alterum imaginatione nostra per terræ centrum traducta, vocatur *Axis mundi*, sicut enim rota circum axē, ita cœlum circū lineam illā imaginariam vertitur rotaturq; terra semper manente immota.

18. *Quod sunt Poli?*

Duo, Arcticus ab *ursa*, sive Borealis, & Antarcticus sive Australis. Ille semper supra, hic semper infra nostrum Horizontem fixus hæret.

CAPUT II.

De Æquatore & Zodiaco.

1. *Quid est Æquator?*

Est circulus maximus, ab utroque Polo æqualiter, hoc est, gradibus nonagenis distans, Globumque in duo hemispheria, Boreale & Australe dividens. Dicitur quoque *Æquinoctialis*, quia sole Æquatorem attingente, dies noctibus sunt æquales. Hunc nautæ *lineam* appellant.

2. *Quid est Zodiacus?*

Zodiacus ab *animal*, est latus ille circulus in Sphæra, ex obliquo bis interfecans Æquatorem, à quo ex una parte septemtrionē versus usque ad Tropicum Cancrī, ex altera versus meridiē usque ad Tropicum Capricorni declinat.

3. *Quid est Ecliptica?*

Est circulus per medium Zodiacum ductus, qui
etiā

etiã *orbita* seu via Solis dicitur, quia per hunc Sol quotidie uno prope gradu ab Occidente Orientem versùs progreditur, donec duodecim Zodiaci signa peragendo cursum annum trecentis sexaginta quinque diebùs & sex fermè horis absolvat. Ecliptica porrò dicitur à *deficio*, quia in hac fiunt eclipses Solis & Lunæ, quoties in eadē sibi vel occurrunt, vel opponūtur.

1. *Quanam duodecim illa signa?*

Sunt Aries, Taurus, Gemini, Cancer, Leo, Virgo, Libraq; Scorpius, Arcitenens, Caper, Amphora, Pisces. Priora sex dicuntur Borealia, posteriora Australia. Ex his signa verna sunt: Aries, Taurus & Gemini. Æstiva: Cancer, Leo & Virgo. Autumnalia, Libra, Scorig, & Arcitenens. Hyemalia: Caper, Amphora & Pisces.

1. *Cur Zodiacus in Globo quoque terrestri describitur?*

Tametsi & hic & alii circuli in cœlesti potiùs Globo mente & cogitatione nostra describi soleant; tamen terrestri quoq; Globo respondent. Ac Zodiacus quidem hyemis ætatisque vicissitudines, dierù ac noctiù incrementa aut decrementa, itē ubi, quo, quantoque tempore Sol quorundam populorum vettici rectā incumbat, ob oculos ponit &c.

C A P U T III.

De Meridiano.

1. *Quid est Meridianus?*

Est circulus maximus, qui per utrumque Polū transiens Equatorē ex transverso intersecat, orbemq; in duo hemisphæria, Orientale nempe & Occidentale æqualiter dividit. Dicitur Meridianus, quòd Sol diurno motu ab ortu in occasū tendens, ut primū attigerit hunc circulum, omnibus sub eodem Meridiano Boream vel Austrum versū positis, meridiem afferat.

2. *Qua ratione & cur Meridianus mutabilis est?*

Licet in Globo æneus ille circulus perset immobilis; tamen si Globus vel tantillū Ortum aut Occasum versū moveatur, alius continuò erit Meridianus, ut proinde quot in Equatore puncta, tot possint esse Meridiani, quorū omnium vices obit immobilis ille circulus.

3. *Quot meridiani Globo inscribi solent?*

Sex & triginta per denos quosque Equatoris gradus ducuntur, quorum unus dicitur *Meridianus primus*; quia ab hoc initium fit numerandi gradus longitudinis, ab Occidente Orientē versū. Hunc alii per Insulas Azores, alii per Hesperides sive Promontorii viridis, alii per Insulas Canarias, Tenerifam, Palmam, vel Ferri &c. ducunt.

4. *Quid est Circulus horarius in Sphæra vel Globo?*

Est parvulus ille circulus meridiano infixus, inque horas bis duodenas distributus cum indice mo-

ce mobili, qui si ritè aptetur, monstrat, quoto
ubique terrarum sit hora.

C A P U T I V.

De Horizonte.

1. Quid est Horizon.

Horizon à *definio, termino*, est circulus maximus, universam mundi sphaeram ita dividens, ut alterum hemisphaerium super terram existet, alterum sub terra condatur. Et hunc in Globo exhibet latus ille circulus ligneus, totum globum ambiens, cui inscribi solent 32. Venti, ac proinde omnes Plagae mundi: ite Calendarium Romanum & 12. signa caelestia, in tricenos singula gradus distributa, ut inde inquiri possit, quoto in gradu cujusque signi Sol qualibet die assignata consistat.

2. Quod praecipuum Horizonti officium?

Ortum & Occalum Solis, ac proinde dierum & noctium quantitatem & varietatem ostendit.

3. Quid nominis est Zenith & Nadir?

Zenith nomen Arabicum latinis est caeli punctum, cujusque vertici rectam incubens. Nadir contra est punctum e diametro oppositum, Antipodum cervicibus imminens. Illud vocari quoque solet *punctum verticale*, hoc punctum *pedale*.

4. Cur Horizon circulus est mutabilis?

Sicut Meridianus aeneus omnium meridianorum, ita Horizon ligneus in Globo vicem supplet omnium Horizontium, qui ad minimam loci mutationem

tionem pariter mutantur non quidē physicē,
& ad oculum, sed mathematicē & secundū
rationē. Unde duplex est Horizon, sensibilis si-
ve apprensus & intelligibilis siue verus. Prior
est omnis ille terræ, cœliq; tractus, qui in paten-
ti campo undiq; in oculos ineurrit, ita ut cœlū
terræ circūcirca adherere videatur, Posteri-
or est circulus ille maximus, qui imaginatione
nostra per centrū terræ transiens totam mundi
sphærā in duo hemisphæria superius & inferi-
us dividit.

CAPUT V.

De Tropicis.

1. Quid sunt Tropici?

Sunt circuli minores, ab Æquatore tres & vi-
ginti gradus cum 30. minutis distantes, ultra
quos sol nunquā progreditur, sed ut primū illu-
c pervenerit, mox cursū sistens retrorsū se
convertit; quamobrem Tropici, à Græco verbo
verto vocantur.

2. Quot sunt Tropici?

Duo, Tropicus nempe Cancrī siue æstivus, &
Tropicus Capricornī siue hybernus.

3. Quis cursus Solis annuus?

Ineunte vere annoquē Astronomico, triū men-
sium spatio ab Æquatore Septentrionē versū
Sol progreditur ad Tropicū Cancrī, ab hoc to-
tidem mensibus regreditur ad Æquatorem, in-
deque

deque tertio trimestri Austrū versū ad Tropi-
cum Capricorni, à quo quarto trimestri rever-
titur ad Æquatorem & principium Arietis.

CAPUT VI.

De Circulis Polaribus.

1. *Quid sunt Circuli Polares?*

Sunt duo circuli minores, tribus & viginti gra-
dibus & 30. minutis à suo quisq; Polo distantes,
quorū alter, qui Polū Arcticū ambit, Arcticus
sive Borealis, alter verò, qui Polo Arctico op-
ponitur. Antarcticus sive Australis appellatur.

2. *Num hi, alique circuli à nobis descripti
re ipsa in cælo terravé inveniuntur?*

Minimè; sed sola ratione & imaginatione eos
concipimus.

3. *Quem in finem iidem fuère excogitati?*

Ut eorū adminiculo Globi partitionē facilius
animo concipere possimus & comprehendere.

CAPUT VII.

De quatuor mundi cardinibus sive plagis.

1. *Quenam quatuor plagæ seu cardines mundi?*

Oriens, Occidens, Septemtrio, & Meridies,
quas omnes Æquator & Meridianus in Horizonte
designat. Oriens quoque dextra, & Occidens
læva mundi plaga à Geographis appellatur.

2. *Quæ plaga intermedia?*

Hæ quaternis illis plagis cardinalibus interja-
cent, suntque universim duodetriginta, è qui-

bus

bus itidē quatuor præcipuè attendi debent, Oriens nempe & Occidens æstivus, ubi Sol in Solsticio æstivo oritur & occidit. Oriens itē & Occidens hyemalis; ubi Sol in Solsticio hyemali oritur & occidit. Omnibus his plagis respondent venti, quorum quatuor Cardinales & 28. intermedii, univesim 32. numerantur.

C A P U T VIII.

De Longitudine & Latitudine locorum.

1. *Quid est latitudo loci?*

Est distantia loci ab Æquatore versùs Polum Arcticum, vel Antarcticum. Illa Borealis, hæc Australis est latitudo.

2. *Quid est longitudo loci?*

Est distantia cujusque loci à primo Meridiano ortum versùs usque ad Meridianum loci.

3. *Unde initium ducitur numerandi gradus Latitudinis & Longitudinis?*

1. Gradus Latitudinis numeramus in Meridiano, incipiendo ab Æquatore Polum versùs. 2. Gradus Longitudinis numeramus in Æquatore, incipiendo à primo Meridiano, & ab Occidente Orientem versùs progrediendo.

4. *Undenam appellatio Latitudinis & Longitudinis?*

Licet Globus per se nec Latitudinē habet, nec Longitudinem, quia tamen spatiū terræ nobis cognitæ occasum inter & ortū à Lusitania per

Euro-

Europam & Asiam ultra Sinas protensum longius est, quam alterum, ab ultimis Sueciæ finibus usque ad extremam Africæ oram meridie versus porrectum, idè illud *Longitudinem*

hoc verò *Latitudinem* appellabant veteres.

5. *Quid est elevatio sive altitudo Poli?*

Est Poli ab Horizonte distantia, quæ semper latitudini loci æqualis est; nam quot gradibus vertex loci ab Æquatore, totidem Polus ab Horizonte distat.

6. *Quæ Poli altitudo sub Æquatore habitantibus? Et quid est sphaera recta?*

Illis nulla esse potest Poli altitudo, cum uterque Polus Horizonti incumbat, ac proinde neuter attollatur. Atque hic situs Globi sphaera recta appellatur, quando nempe uterque Polus Horizonti, & Æquator vertici incumbit.

7. *Quam Poli altitudinē haberent, si qui sub Polis ipsis habitarent? Et quid est Sphaera parallela?*

His summa esset altitudo Poli, utpote qui recta vertici immineret. Æquator autem & Horizon ibi concurrerent, essentque paralleli, ac proinde Sphaera parallela.

8. *Quam demum Poli altitudinē habent, neque sub Polo, neque sub Æquatore, sed utrique oblique interjacent? Et quid est Sphaera obliqua?*

His alia atque alia est Poli altitudo, prout nēpe à Polo minùs, magisque sunt remoti. Quò propinquior autem regio quædam polo est, eò

ma-

major ibi est altitudo Poli. Omnis porro hic
Globi situs Sphæra obliqua dicitur.

CAPUT IX.

De Zonis.

1. *Quid sunt Zonæ?*

Sunt spatia quædam, seu circuli lati, Equatori paralleli, inter 2. Tropicos & Polares circulos comprehensi, quibus veluti cingulis & fasciis totus Globus terrestris circūdatur & cingitur

2. *Quot sunt Zonæ?*

Quinque à Geographis numerantur. Dux frigida, Septentrionalis & Australis. Dux temperata, itidem Septentrionalis & Australis, & una torrida.

3. *Quid sunt Zonæ frigida?*

Quæ inter circulos Polares & Polos ipsos locatæ, ob Solis diurnam absentiam, & remotionem nimiam immodico frigore vexantur,

4. *Quæ sunt Zonæ temperata?*

Quæ Tropicos inter ac Polares circulos quasi in medio frigus inter & calorem positæ sunt, unde & temperatæ dicuntur.

5. *Quid est Zona torrida?*

Est spatium inter duos Tropicos comprehensum, & ab Equatore bifariam divisum, cujus pars, quæ ad Septentrionem vergit, Torrida Borealis, quæ ad plagam Meridionalem, Australis dicitur.

6. *Cur*

6. *Cur vocatur torrida*

Quòd continuo Solis, nunquam id spatium e-
gredientis, ardore quasi torreri, atque idcirco
à nemine inhabitari posse olim putabatur. Ve-
rùm passim à mortalibus incolitur, longioris
temperie noctis, crebrisque imbris nimium
calorem mitigantibus.

CAPUT X.

De diversis anni temporibus in diversis
Zonis.

1. *Quæ anni tempora Zona torrida incolis
accidunt?*

Qui sub ipso Æquatore habitant, duas quot-
annis habent æstates, quia Sol bis eorum ver-
tici incumbit, & duas quasi hyemes; quando
nempe Sol versùs Tropicos recedit.

2. *Quanam anni mutationes in Zonis frigidis?*
Hic ob nimiam Solis remotionem perpetua
ferè hyems est, frigusque ingens.

3. *Quæ anni, temporumque vicissitudines ac-
cidunt Zona temperata incolis?*

His quatuor sunt anni tempora, Hyems nem-
pe, Ver, Æstas, & Autumnus.

4. *In qua Zona continetur Germania
Polonia & Ungaria?*

In Zona temperata Septemtrionali.

5. *Quando nostris in regionibus initium est hy-
emis, Veris, Æstatis & Autumni?*

Hyems

Hyems initium sumit 22. Decembris, quando Sol Tropicum & signum Capricorni attingit. Ver autem 21. Martii, quando Sol Equatorem & punctum Arietis ingreditur. Æstas verò 22. Junii, quando Tropicum & signum Canceris. Autumnus demum 23. Septembris, quando Sol ad æquatorem reversus, signum Libræ subit.

CAPUT XI.

De Climatis.

1. Quid est Clima?

Clima ab *inclinio*, minor Zona, sive terræ spatium est duobus parallelis comprehensum, in quo dies longissimus dimidia semper hora crescit. Hæc potè climata ab Equatore ad circulos Polares gradatim descendunt, ita ut inter Parallelam extremum unius, & extremum alterius climatis dies longissima differat semihora. Quod propius tamè hæc climata ad circulos Polares accedunt, eò sunt contractiora; Nam clima primū & Equatori proximū gradus 8. & 25. minuta, in Meridiano numeranda, sequentia gradus semper pauciores; postreà verò nō nisi minuta aliquot, eaq; identidē pauciora latitudine sua continent.

2. Quod sunt climata?

Quatuor & viginti Septentrionalia, & totidem Australia. Cùm enī ab Equatore, ubi dies perpetuū est 12. horarum, usque ad circulum Polarem, ubi dies longissimus & 24. horarum, dies crescat

crefcatur horis duodecim five 24. femihoris, totidē hodierni Geographi numerant climata. A circulo verò Polari ad ipsum ufque Polum sex alia climata ftatui poffunt, in quibus differentia nō eft femihorarū, fed menfium, ut nempe in fine primi climatis, dies longiffimus fit unius menfis, duorū in fecundi, triū in tertii, quatuor in quarti, quinque in quinti, & in fine sexti, five ad Polum ipfam sex menfium.

3. Undenam fciri potefl, quoto fub climate quilibet locus fitus fit?

Supputandæ erunt femihoræ, quibus dies longiffimus fuperat diē Æquinoctialē five 12 horarum; fi enī hunc fuperat femihoris octonis, uti in plerifq; Germaniæ, Poloniæ & Hungariæ locis, hæc fub octavo funt climate, fi feptenis, aut novenis, fub feptimo aut nono erūt climate.

C A P U T XII.

De diverfis effectibus curfûs Solaris.

1. Unde dies & nox oritur?

A folis vel præfentia, vel abfentia. Quamdiu enim Sol fupra Horizontem noftrum moratur, dies eft; nox verò, quamdiu infra eundem delitefcit.

2. Quantum diei noctisque fpatium fub ipsis Polis?

Dies ibi fex menfium eft, hocque elapfo nox feમેftris ingruit.

3. Undenam tam longa dies?

B

Inde,

Inde, quòd Sol sex mensibus supra Horizontem, qui cum Æquatore ibi parallelus est, commoretur, perpetuòque in orbem circumiens, sex signa percurrat, donec infra Horizontem sex mensibus latens, noctem semestrem efficiat, ut in Sphæra parallela ad oculos patet.

4. *Quæ dierum noctiumque diversitas in Zonia frigidis?*

Pro varietate climatum dies ibi longissimus est vel 5. vel 4. vel 3. vel 2. vel unius mensis, ut supra dictum est. idemque de noctibus, quæ quòd longiores sunt, eò dies breviores.

5. *Quàm longa dies & nox sub Æquatore habitantibus*

His anno toto dies noctibus sunt æquales, sive 12. horarum, uti in Sphæra recta videre licet.

6. *Quantum diei noctisque spatium sub Zonia temperatis?*

Variū pro varietate climatum. Sic sub climate vicesimo quarto & ultimo ultra Sueciam dies longissimus est 24. horarū, apud nos verò sub climate octavo dies longissimus est 16. horarum.

7. *Cur dies versus Circulos Polares magis semper magisque crescunt?*

Ob majorē Poli, atque ad eò Tropici altitudinē, quæ ubi Sol attigerit, longissimū efficit diem.

8. *Quid est Aurora? quid Crepusculum?*

Aurora est prima diei lux ad Orientē ante Solis adventū conspicua, quando Sol decē & octo gradibus

gradibus ab Horizonte distat, eoque magis au-
 gescit, quò Sol Horizonti sit propinquior. Cre-
 pusculum verò est lux illa, quæ post Solis occa-
 sum conspicua sensim minuitur, donec tandem
 Sole infra Horizontem decem & octo gradi-
 bus depresso, penitus evanescat.

9. *Quinam Ascii, Periscii, Heteroscii, &
 Amphiscii?*

Ita distingvi solent terræ incolæ pro diversita-
 te umbræ, quâ tempore meridiano projiciunt,
 Ascii sive umbrâ carentes sunt, qui nullam ha-
 bent umbram meridianam. Tales sunt omnes
 Zonæ torridæ incolæ, quoties Sol verticè eorū
 transit. Periscii sunt, quorū umbra in orbem
 spargitur. Tales forent, qui directè sub Polis ha-
 bitarent, & spherâ haberent parallelâ. Hetero-
 scii sunt, qui umbrâ meridianâ semper projici-
 unt vel versùs Boreâ, vel versùs Austrū. Tales
 sunt, qui degunt in Zonis temperatis, vel fri-
 gidis extra Polos: nam qui Boreales incolunt
 Zonas, semper projiciunt umbrâ versùs Septem-
 trionem: qui verò australes, versùs meridiem.
 Amphiscii sunt, quorū umbræ meridianæ mo-
 dò sunt Boreales, modò Australes, prout nem-
 pe Sol nunc signa Borealia, nunc Australia per-
 currit. Tales sunt omnes, qui intra Zonam tor-
 ridam, & non sub ipsis Tropicis habitant.

10. *Quinam Periaci, Anteci, & Antipodes?*
 Periaci à circa & habito sic dicti sunt, qui sub

eodē Meridiano & Parallelo habitant, ita tamē, ut in Parallelo unus distet ab altero 180. gradibus, & in Meridiano inter utrumq; medius sit idem Polus. His idem clima, eadē Poli altitudo, eadem anni tempora. At quando uni meridies, alteri media nox est.

Antœci, quasi contra habitantes sunt, qui sub eodem quidē Meridiano, sed sub diversis Parallelis æqualiter ab Æquatore versùs utrūq; Polum distantibus habitant. His simul medius dies & media nox est; at cū dies crescunt Borealibus, Australibus decrescunt; & cū ver illis, his autumnus, cumq; illis æstas, his hyems est &c.

Antipodes à *contra*, & *pes*, à *terra* sunt, qui pedes nobis directè obvertunt, atque in eodem quidem meridiano, sed in diverso sunt hemisphærio. Hi nobiscum eundē habent Horizontem, sed diversam ejus faciem, & æqualē Poli altitudnem; sed Australem illi, nos Borealem. Cū Sol illis oritur, nobis occidit, cū illis meridies, nobis media nox est; cū illis dies aut nox longissima, nobis brevissima; cū æstas illis, nobis hyems ingruit &c.

C A P U T XIII.

De usu Globi.

i. *Quo pacto ritè collocandus Globus?*

1. Globum colloca in mensa aut tabola plana, Ita ut ejus Horizon sit mundi Horizonti parallelus.

telus. 2. Polum pro loci tui, ubi versaris, latitudine attolle ab Horizonte. 3. Ita Globū converte, ut meridianus respondeat lineæ meridianæ, quā monstrat pyxis nautica, in Basi Horizontis locata; Polusque Arcticus respiciat Septentrionē, Antarcticus Meridiē. Si desit acus magnetica correcta, aut alia linea meridiana in plano ducta, servire utcumq; poterit structura templorū antiquiorū, in quibus ara summa constructa est ad orientem.

2. *Qua ratione altitudo Poli sive latitudo cujuslibet loci inveniri potest in Globo?*

Verte Globum, donec locus, cujus latitudinem inquiris, subjaceat Meridiano æneo, in quo si numeraveris gradus ab Æquatore usq; ad locū datū, habebis latitudinē quæ sita, simulque Poli altitudinem, quæ semper latitudini æqualis est. Unde inventa loci latitudine, attolle totidem gradibus Polum ab Horizonte, locumque subde Meridiano, & in hoc Polo Horizontem versū numerā & habebis altitudinem Poli.

3. *Quomodo invenienda longitudo diei?*

Locum, cujus longitudinem scire cupis, applica Meridiano æneo Globi: inde in Æquatore numera gradus usque ad primū Meridianum versū occasum (vel si à primo Meridiano numerandi initium sit, ortum versū) & habebis longitudinem quæ sitam.

4. *Quo pacto inveniendus loci Horizontis Meridianus?*

B₃

Attolle

Attolle Polū, prout loc9 dat9 exigit; tum locū hunc subijce Meridiano, ut Globi verticē occupet. & habebis Horizontē simul ac Meridianū.

5. *Qua ratione possum cognoscere, quota ubivis terrarum quovis tempore sit hora?*

Locum, quē incolis, colloca sub Meridiano æneo, & indicem horariū applica horæ datæ in tuo loco. Inde si scire cupis horam in plagis orientalibus, volve Globū ab oriente versū occidentē; versū orientē verō si horam quæris in plagis occidentalibus, donec locus, cujus hora indagas, subiaceat Meridiano æneo. Tunc enim index horarius monstrabit horam quæsitā.

P A R S II.

De Mappis seu chartis Geographicis.

C A P U T I.

De Planisphærio terrestri.

1. *Quid est Planisphærium terrestre?*

Est mappa sive charta Geographica universalis, quæ totum terrarum orbem in plano depictum exhibet.

2. *Ecquodnam discrimen Globum inter & Planisphærium?*

Ille terrarum orbem in Globo & Sphæra; istud eundem orbē in duo hemisphæria divisum in piano sive charta ita exhibet, quasi Globus in geminas æqualiter dissect9 sit partes, ambæque juxtim, jaceant.

3. *Quid*

2. *Quid sibi volunt diversa linea in Planisphærio descriptæ?*

Hæ vices subeunt circulorum in Globo descriptorum, uti sunt Equator, ejusq; Paralleli, sive Equatores secundarii 16. per denos quosq; Meridiani gradus ducti; Meridianus primus, & secundarii 34. Duo item Tropici & totidem Polares. Equator ab occasu in ortum per utrumque hemisphærium rectæ, sed crassioris instar lineæ extenditur, & in 350. gradus, quorū 180. in uno, totidēq; in altero sunt hemisphærio, dividitur, initio facto à primo meridiano. Meridianus hic ambit utrumque hemisphæriū ita ut duo appareant Meridiani, qui tamen ita sunt considerandi, tanquā in unū coaluissent. Meridiani secundarii sunt lineæ incurvæ intra Meridiani primarii ambitum per denos quosque Equatoris gradus ductæ versùs utrumque Polum, ubi lineæ hæ omnes concurrunt, si tabulæ sint rotundæ; non item si quadratæ. In Planisphærio porro Parallelos arctius in medio conjungi, disjungi verò in extremitate necesse est, id quod in Globo minimè accidit.

C A P U T II.

De mappis Geographicis generatim.

1. *Quid est Chorographia? quid Topographia?*
 Chorographia est regionis *descriptio*; Topographia verò est peculiaris cujusdam loci, v. g.

urbs cum jacente tractu descriptio.

2. *Quid est mappa seu charta Geographica?*

Est accurata situs terræ, vel ejus partium in plano & charta adumbratio.

3. *Quotuplicis generis sunt mappa?*

Duplicis; alix enim sunt universales, quæ orbē terrarum universū depictū exhibent; alix particulares, & hæ vel *maiores*, in quibus majores orbis partes, ut Europa, Asia, Africa, America depinguntur, vel *minores*, in quibz vel Regnum quodpiam, aut Provincia, vel regionis duntaxat pars, tractusvè at quis delineatur.

4. *Quid in mappis universalibus præcipuè attendendum?*

In harum, imò & quarumcunque mappatū aspectu facies ad Polum Arcticum, sive Septentrionem, qui in superiore parte mappæ inscribitur, convertenda est; sic enim ad dextrā erit ortus, ad sinistram verò occasus, Inde quoque patebit, quæ regiones cum præsentē hac comparatæ, sint orientales, quæ occidentales, Boreales vel Australes. Considerandū item, quæ regiones cis aut ultra Æquatorē, quæ ad dextrā primi Meridiani; quævé ad sinistram. Dein qua sub Zona aut climate sit quælibet Regio, quæ ejusdem latitudo & longitudo Geographica, vel etiam Physica, hoc est, quot contineat milliaria in longitudine, latitudine & circuitu; quæ loci hujus ab altero distantia &c.

5. *Qua*

5. *Qua ratione in mappis invenienda longitudo
& latitudo loci?*

Longitudinē indicant lineæ transversæ, Equatori, aut ejusdem Parallelis respondentes, dux ad supernam, infernamque mappæ orā ab ortu in occasū ductæ *Scala longitudinis*, quod in iis numerantur gradus *longitudinis*, vocari solent. Quæ verò lineæ in dextro sinistroque mappæ margine à Septentrione in Meridiē ducuntur, ac Meridiano respondent, appellantur *Scala latitudinis*, sive quod idem est *elevationis Poli*.

6. *Cur mappis plerisque pyxis nautica, vulgò
compassus appingi solet?*

Ut lingulæ, quæ lili formā refert, semperque Septentrionem respicit, beneficio, mappa ad quatuor mundi plagas aptari possit. Quanquā plerumque pars mappæ superior Septentrionem, inferior Meridiē, sinistra Occasum, dextima; Ortum teneat.

7. *Quo pacto Regiones, earumque limites, urbes
item & Pagi &c. discerni possunt?*

Limites punctis indicantur; regiones verò ipsæ diversis discriminantur coloribus. Urbes turribus, nec rarò castella, oppida, arces, monasteria, pagi, &c. certis quibusdā notis discernuntur.

8. *Qua ratione locorum distantia indagari
potest?*

Per scalam milliarium, mappis plerisque apponi solitam.

CAPUT III.

De variis dimensionibus Geographicis.

1. *Quid est Gradus?*

Est trecentesima sexagesima circuli pars.

2. *Quot milliaria Germanica continet Gradus?*

Quindecim; quod tamen de gradibus in circulis maximis intelligendū; nam in minoribus, quales sunt Paralleli, Tropici &c. Gradus quilibet eō pauciora continet milliaria, quōd propius circuli illi ad Polum accedunt.

3. *Quot milliaria Germanica trecenti & sexaginta illi gradus conficiunt? Quot Hungarica?*

Quinquies mille & quadringenta, tot enim milliaria, totus terrarum orbis complectitur.

Hungarica 3600.

4. *Quid milliare Germanicum? quid Polonicum? Hungaricum? quid Gallicum? quid Italicum?*

Germanicum duarum est horarum, Polonicum unius, Hungaricū trium, sesquihoræ Gallicū, Italicum ferè semihoræ. Advertendum tamen, nullam fere gentē æquis ubique uti intervallorū dimensionibus; nam sicut Germanis pro regionū diversitate milliaria alia sunt majora, alia minora, alia cōmunia, quorū quindecim unum constituunt gradum in circulis majoribus, ita Hispanis quoque & Gallis leuca & milliaria aliis gentibus sunt inæqualia.

5. *Quid & quotuplex est Minutum?*

Minuta

Minuta alia sunt horaria, alia Geographica
 Minutū Geographicū est sexagesima pars gra-
 dūs constans dimidiā horā sive quarta parte mil-
 liaris Germanici. Minutum horariū est sexage-
 sima pars horæ, quod minutum dividitur in
 minuta secunda, & secundum in tertia.

6. *Quomodo scala milliarium applicanda?*

Unus circini pes uni, alter alteri loco, cujus
 distantia quæritur, insigatur. Inde circino sca-
 læ milliarium admoto, mox patebit, quot mil-
 liaribus locus unus ab altero sit seunctus.

7. *Quæ sunt minores mensuræ, ex quibus tanquā
 partibus milliare constat?*

1. Granum hordei secundum latitudinē dispo-
 situm. 2. Digitus. 3. Palmus, qui duplex est
 major sive *Spithama* duodecim digitorū, & mi-
 nor quatuor digitorum. 4. Pes. 5. Passus, qui
 itidem duplex est, major sive *compositus*, qui &
Geometricus dicitur, quinque pedum, & minor
 sive *simplex* duorum pedum cum dimidio. 6.
 Stadium. 7. Milliare Germanicum sive Italicū.
 mille passuum. 8. Leuca bis mille passuū, sive
 duplex milliare Italicum. Geometræ memoriæ
 causa mensuras omnes hisce versiculis sunt
 complexi.

Quatuor è *granis* *Digitus* componitur unus.

Est quater in *Palmo* *Digitus*, quater in *Pede* pal-
 mus.

Quinque pedes *Passū* faciunt; *Passus* quoque
 centum.

Vigia-

Viginti quinque; *Stadium* dant: sed *Miliare*
Octo dabunt stadia, & duplicatū dat tibi *Leucā*.

C A P U T I V.

De variis vocabulis Geographicis.

1. *Quid est Oceanus?*

Est universa aquarum moles, terris passim in-
fusa, orbēque universum immenso propè am-
bitu circumplectens, qui in varia maria & sinus
distribuitur.

2. *Quid est Sinus?*

Est maris pars, in terræ continentis gremium
longiùs se insinuans, quæ si latior sit, amplio-
risque accessus, nec in terram longiùs procur-
rens, *Bayæ* vulgò dicitur.

3. *Quid est Fretum?*

Est mare inter duas terras angusto tractu de-
currens, & duo maria conjungens.

4. *Quid est Euripus seu vortex maris?*

Est vorago seu gurgis maris, ubi aqua coelestis
instar in se contorta, proxima quæque magno
impetu absorbet. Ex Euripis nominatissimus
est Chalcidicus Eubœam inter & Achaiã, qui
septies quotidie absorbere & revomere undas
dicitur. Itē maximus ille vortex seu euripus ad
Norvegiam, uti & Charybdis in freto Siculo.

5. *Quid est Bosphorus?*

Bosphorus sive Bosporus à *bovis* & *trajectus*,
quasi bovis trajectus, duplex celebratur: unus

Thra-

Thracicus, qui est fretum angustum inter Byzantium in Europa, & Chalcedonem in Asia, quatuor stadiis patens, unde utrinque cantus Gallorum, latratus canum, clamoresque hominū exaudiri possunt. Alter Bosphorus Cimerius appellatur, estque fretū angustū inter Tauricā Chersonesum in Europa, & Sarmatiā in Asia,

6. *Quid est Estuarium?*

Est quasi sinus quidam aquis marinis refertus ex inundationibus exstantis pelagi.

7. *Quid sunt Brevia & Syrtes?*

Brevia sunt loca maris vadosa & sabulosa, ubi congestis arenarum cumulis quasi aggere quodā naves cinguntur, mergunturque. Syrtes speciatim appellantur duo loca periculosissima in mari Africano, à *traho*, quoniam arenā copiosā saxaque ingentia trahunt, & huc illucque transferunt & accumulāt, sic appellatæ. Plures itē alii scopuli in mari latentes, quibus allisæ naves peteunt, Syrtes vocari solent.

8. *Quid est Portus?*

Est locus ad sinuosum maris littus à natura vel arte ita aptatus, ut inde solvi appellique navigia, atque à piratarum & hostium insidiis, cœli item marisque injuriis secunda esse possint. Locus porrò, ubi naves anchoris tenentur, ac vel onerantur, vel exonerantur, *Rheede* vel *Rhay*; de vulgò dicitur.

9. *Quid est continens? quid Insula, Peninsula, Isthmus,*

Isthmus Promontorium, Alpes & Pylæ?

1. Continens est terra longo tractu alteri terræ ita cohærens, ut nullo mari sejungatur. 2. Insula contra, terra est aquis undique cincta. 3. Peninsula, græcè Chersonesus, terra est, quæ aquis ita circumdatur, ut tamen aliqua sui parte continenti adhæreat. 4. Isthmus est per angustus terræ limes inter duo maria, Peninsula cū continente vel cum alia Peninsula connectens. 5. Promontoriū est mons in mare longius procurrentis. 6. Alpes non tantum sunt montes illi præalti, qui Italiā à Gallia Germaniāque separant, sed ii quoque omnes, qui tractu continuo per totā propemodū Europā brachia quasi experrigunt, variāque à variis regionibus trahunt nomina. 7. Pylæ à Porta sunt angustæ montium fauces sive aditus.

10. *Quid est littus? quid ripa?*

Littus sive ora est terra mari adjacens, quæ fluminibus alluitur; Ripa verò est terræ extremæ ora, quæ utrinque flumine alluitur. Littus propriè de mari dicitur, sicut Ripa de fluminibus.

11. *Quid est fons, torrens, fluvius, lacus, stagnum & palus?*

1. Fons est aqua scaturiens, ac velut saliendo aut ebulliendo è tellure prorūpens. 2. Torrens est aqua magno fluens impetu è copiosis aut diuturnis imbribus vel soluta nive nascens, & nonnunquā propè deficiens. 3. Fluvius est aqua jugiter

jugiter decurrens fluensq; , e pluribus rivis a torrentibus collecta. 4. Lacus est aqua quiescens ex pluribus in fundo scaturiginibus, aut etiam rivo vel fluvio interfluente, perennibus lymphis abundans. 5. Stagnum est minor lacus. 6. Palus est aqua quiescens, cœnosa, putridaque ex pluviis ut plurimū, nivibusq; aut tenuioribus fontibus & rivulis collecta, ac subinde, sicca præsertim æstate evanescens.

12. *Quid sunt Ostia?*

Sunt fluviorum exitus, per quos in mare vel alium etiam fluvium exonerantur.

C A P U T V.

De Globi terraquei divisione.

1. *Quasnam in partes orbis terrarum dividitur?*

In terram & aquam. Terra rursus dividitur in duas prægrandes Insulas, quarum quæ in planisphærio dextrum occupat hemisphæriū, vetus orbis, sinistrum, novus orbis appellatur.

2. *Quas in partes orbem veterem divisere antiquiores Geographi?*

In tres, Europā nempe, Asiā & Africā. Quanquam ex his ipsis & Regiones, & Insulæ, & maria complura id temporis incognita prorsus erant, quæ posteriorum solers detexit industria. Sed & hac nostra ætate novi æquæ ac veteris orbis regiones nō paucæ, præsertim, quæ utriusque Polo circumjacent, nobis adhuc sunt ignotæ.

3. *Quod no*

3. *Quod novo orbi nomen?*

Hic à Christophoro Columbo Genuensi 1492. primùm detectus, ac postea Americo Vesputio Florentino; qui magna ex parte eundē illustravit, America est appellatus.

4. *Quem situm quatuor hæ orbis partes obtinent?*

Europa Septentrionem, Asia Orientē, Africa Meridiem, America Occidentem spectat.

CAPUT VI.

Divisio Aquarum.

1. *Quas in partes dividitur Oceanus?*

Hic à quatuor orbis plagis, dein etiam à variis, quas alluit, regionibus varia trahit nomina.

2. *Quid est Oceanus Septentrionalis sive Glacialis?*

Qui ad Septentrionem recedens vehementi frigore congelascit.

3. *Quid est Oceanus Orientalis, Eous, sive Indicus?*

Qui Orientem versùs ultra Asiam & Chinam porrigitur?

4. *Quid Oceanus Australis sive Æthiopus?*

Qui Æthiopiã partemq; Africæ Australē alluit.

5. *Quid est Oceanus Occidentalis sive Atlanticus?*

Qui ultra Hispaniam & Lusitaniam Occidentem versùs procurrit, nomenq; trahit ab Atlantide monte maximo, qui ab ea Oceani parte per totam Africam se extendit.

6. *Quid est mare Pacificum, vulgò Mar del Zuro?*

Quod

Quod Asiam inter & Americam & terrā Australē incognitā, sive Magiellanicā interfusū, ab Hispanis *Mar del Zur*, id est, Mare Australe, & *Pacificum* à fluctuū placiditate nominatur.

7. *Quid est Mare Septemtrionale, vulgò Mar del Nord?*

Quod Americam inter, Europam & Asiam, ad Equatorem usque protenditur.

8. *Quid est Mare Gallicum, Germanicum, Hybernium, Indicum &c.*

Diversæ sunt Oceani partes, quæ à regionibus, quas alluunt, sic appellantur.

9. *Quid est Mare Mediterraneum?*

Pars est Oceani Atlantici, qui à Solis occasu per fretum Gaditanum irrumpens inter Europā Africā & Asiam medius quasi diffunditur, unde Mare *Mediterraneum* & *internū* dicitur.

10. *Ubinam Mare Nigrū, sive Pontus Euxinus?*
In Turcia Europæa Asiam versus, in quod Danubius se evolvit. Dicitur *Nigrum* ob perpetuas ferè nebulas mari huic incumbentes.

11. *Ubinam Mare Album?*

Septemtrionem versus ad extrema Moscoviz littora; quo nomine Barbari etiam Mare *Ægæum* appellant ad distinctionem Maris nigri, sive Ponti Euxini.

12. *Ubi Mare Rubrum, sive Erythraeum?*

Ægyptum inter & Arabiam, sinus idcirco *Arabicus*, sive *Mare Rubrum* dictum, vel ob rubras arenas,

arenas, vel à Rege Erythra, in Insula Ogyri ibidem sepulto; vel potiùs ob rubram plantam, quam Æthiopes *Zuph* vocant, in mari hoc copiosissimè germinantem.

13. *Quid est Archipelagus?*

Est mare plurimis insulis interceptum, quale est 1. Ægæum. 2. Mexicanum ad insulas Antillas. 3. Archipelagus S. Lazari ad insulas Marianas. 4. Ad insulas Maldivas, quarum incredibile numerus in mari Indico.

14. *Quid est Propontis sive Mar di Marmora?*

Est mare illud, quod ab Hellesponti angustis, sive freto *Dardanellarum* ad Thracicum usque Bosphorum protenditur. Dicitur Propontis ab *ante & mare*, quasi vestibulum Ponti Euxini. Hodie *Mar di Marmora* ab adjacente insula & urbe Marmora appellatur.

15. *Ubinam Mare Caspium, sive Mar de Sala?*

Mare Caspium sive Hyrcanum (hodie *Mar de Sala*, & *Mar de Bachu*; item *Mare clausum*) Persiam inter, Tartariam magnam, Moscoviam & Georgiam (vulgò *Gurgistan*) concluditur, neque alteri mari, nisi forte per occultos meatus, miscetur. Unde Ptolomæus maluit lacum appellare, cum pedibus circuii possit. In hoc mare Oxus fluvius, & Volga ingenti aquarum mole sese evolvunt.

16. *Ubi Mare Balticum, Sinus Finnicus Bothernicus & Livonicus?*

Mare

Mare Balticum (olim *Sinus Codanus*, sive mare Orientale) Daniam, Sveciã, Livoniã, Prussiam, Pomeraniam & Poloniam interjacet, atque in tres iterum Sinus se diffundit, Bothnicum nempe, Finnicum & Livonicũ. Verũm hæc omnia clariũs ob oculos ponent mappæ Geographicæ, de quibus modo agendum.

C A P U T VII.

Mappa Geographica Europæ.

1. *Quanam sub Zona sita est Europæ?*

Partem potissimam sub Zona temperata Septemtrionali.

2. *Qui Europæ termini?*

Hanc ad Orientem Obius fluvius ab Asia; ad Meridiem mare Mediterraneũ ab Africa disternat. Ad Occidentem Oceanus Atlanticus, ad Septemtrionem mare Glaciale interjacet.

2. *Quæ Europæ in mappa Geographica species?*

Virginis sedentis, cujus *diadema* Lusitania, *caput* Hispania, *monile* montes Pyrenæi, *collum* & *pectus* Gallia, *brachium sinistrum* Britannia magna & Hibernia, *dextrum* Italia. Sub *leva axilla* Belgiũ, sub *dextra* Helvetici fœderis sunt Provincie. Reliquũ *Corpus* est Germania, Polonia Hungaria; *genua* Dania, Svecia, Norvegia, *toga* Moscovia, *syrma* Turcia Europæ & Græcia.

1. *Qui precipui Europæ fluvii?*

C 2

1. Tana

1. Tanais fluvius est Moscoviæ. 2. Lithvaniæ Borysthenes. 3. Germaniæ Danubius & Rheng. 4. Italiæ Tiberis & Eridanus, sive Padus. 5. Angliæ Tamesis. 6. Galliæ Rhodanus, Sequana & Ligeris. 7. Hispaniæ Iberus, & Ertis. 8. Lusitaniæ Tagus & Durius. Poloniæ Vistula.

5. *Qui Europæ montes celebriores?*

Præ omnibus commemorandæ sunt Alpes, quæ Italiam à Gallia & Germania sejungunt; quippe non tantùm montes Pyrenæi, qui Galliam ab Hispania separant; sed Sabaudiæ quoque, Vallesiæ, Helvetiæ, Rhetiæ, Tyrolis, ditiois Salisburgensis, Carinthiæ, Carniolæ, Styriæ &c. montes item Carpathii, qui Poloniam ab Hungaria & Sudeti sive Gigantei, qui Bohemiã à Silesia determinant Alpina sunt brachia.

6. *Quid de Sylvis memorandum?*

Sicut montes, ita & sylvæ, licet diversis appellentur nominibus; ab Alpibus tamen omnes incipiunt, indeq; continuo quasi tractu quaquaversum se propagant. Inter omnes principatim tenet Sylva Hercynia, quæ 1. ad Brisgojam & in ditioe Funrstenbergensi *Sylva nigra*. 2. in Palatinatu inferiore *Ostena*, 3. in Episcopatu Bambergensi, *Steigerwald*. 4. inter Lohnam & Sigam fluvios *Werstewaldta* sive *Occidentalis*. 5. Francofurtum inter & Abbatiam Fuldensensem. 6. in Principatu Grubenhagenensi & Anhaltino *Hercynia*. 7. in Thuringia *Thuringica*, 8. in Bohemia

hem
ab k
Pa
Mo
Tra
7.
L
Lusi
flum
gen
Mat
trem
rium
8. Q
Euro
fit in
hum
nibu
que
1. So
giam
gim

hemia *Bohemica* appellatur &c. Hæc Franconiã ab Hassia & Thuringia, Bohemiã à Voilandia, Palatinatu Superiore & Bavaria dispescit, & in Moraviam, totumque ferè Noricũ, Hungariã, Transylvaniã, Valachiã, Moldaviã, Poloniam, Russiam, Moscoviam, &c. porrigitur.

7. *Quot milliaribus Europa circumscribitur ?*

Longitudo ejus sumã à Promontorio Sacro Lusitanie (Capo S. Vincente) ad Obii usque fluminis ostiũ milliaria Germanica circiter nõ-genta; latitudo verò maxima à Tænaro (Capo Matapan) Peloponensi promontorio ad extremum usque Lappiæ Norvegicæ promontorium Boreale, vulgò *Nord-Cap* milliaria amplius quingenta complectitur.

8. *Quenam inter quatuor Orbis partes principatum obtinent ?*

Europa, quæ licet magnitudine cæteris longè sit inferior, bellicæ tamen laudis gloriã, artiũ, humanitatis & literarum culturã, negotiationibus, morũ ac vitæ politioris disciplinã, aliisque prærogativis principem sibi locum jure vindicat.

9. *Quenam præcipua Europa partes ?*

Decem majores, octoque minores.

10. *Quenam majores decem ?*

1. Scandia sive Scandinavia peninsula, Norve-giam & Sueciam complectens, cui Daniã jun-gimus. 2. Moscovia sive Russia, 3. Polonia, 4. Ungaria,

Hungaria, 5. Turcia Europæa. 6. Germania. 7. Britannia magna, hoc est Anglia & Scotia, ad-
junctâ Hibernia, 8. Italia, 9. Gallia, 10. Hispa-
nia, cui addimus Lusitaniam.

11. *Quæ octo minores Europæ partes?*

1. Belgium, 2. Lotharingia. 3. Helvetia, 4. Sabaudia, quæ Galliam inter & Germaniam fr-
tæ sunt. 5. Transylvania. 6. Valachia, 7. Mold-
davia, 8. Tartaria minor, quæ Poloniâ & Tur-
ciam Europæam interjacent.

12. *Quæ alia Europæ divisio?*

Dividi hæc etiam potest in regiones, continen-
tes, Peninsulas & Insulas.

13. *Quæ Peninsula?*

1. Scandinavia, 2. Chersonesus Cimbrica, ubi
hodie Jutia & Slesvicum, 3. Chersonesus Tarta-
rica sive Tartaria Crimæa, 4. Peloponnesus
sive Morea. Continentes sunt reliquæ regio-
nes paulò antè memoratæ; è quibus tamen Ita-
lia etiam inter peninsulas numerari potest.

14. *Quæ Insula?*

1. In Oceano sunt Anglia, Scotia, Hibernia,
Islandia cum minoribus aliquot. 2. In mari
Baltico Scelandia, Fionia, pluresq; aliæ mino-
res. 3. In Mediterraneo Sicilia, Sardinia, Cor-
fica, Candia sive Creta, Balearis major, sive
Majorica, Balearis minor, sive Minorica &c.

15. *Quæ Regiminis forma in Europa?*

Triplex, 1. *Monarchica*, ubi unus solus rerum
potitur.

potitur. 2. *Aristocratica*, ubi Optimates imperant. 3. *Democratica*, ubi plebs ipsa dominatur, vel saltem ex hac deliguntur populi præfides. Siqui porrò ex triplici hac classe subiectos sibi populos propè ut mancipia habent, suis duntaxat rationibus, comòdisque intenti, ii Tyranni appellantur.

16. *Quæ in Europa lingua usitata?*

Quatuor matrices, Græca nimirum (cujus tamen ulus hodie rarissimus) Latina, Teutonica, & Sclavonica. E. *Latina* Italica, Gallica & Hispanica. E. *Germanica* Svecica, Danica, Belgica & Anglica; è *Sclavonica* verò Bohemica, Polonica, Russica &c. ortum traxère.

17. *Quæ antiquæ Europa divisio?*

1. Magna Peninsula Scandinavia Sveciam & Norvegiam. 2. Sarmatia Europæa Moscoviam, Poloniã & Lithvaniã, 3. Illyricum Dalmariam, Bosniam, Croatiam, Istriam, Forum Julium &c. 4. Scythia Europæa Transylvaniã, Valachiam, Moldaviam, & Tartariam minorè, 5. Tracia Romaniã sive Turciam Europæam, 6. Mæssia, Serviam & Bulgariam. 7. Pannonia Hungariam, regionesque conterminas complectebatur. Germania porrò, Gallia, Italia, Hispania, Britannia &c. pristinam appellationem etiamnum retinent.

C A P U T VIII.

De novem majoribus Europæ partibus.
Exordium ducimus à Germania. Inde ad Septemtrionem digressi, à Peninsula Scandinavia ad Lusitaniam usque gradum faciemus.

§. I.

De mappa Geographica Imperii Germanici.

1. *Quis hujus situs, qui terminus?*

Meditullium ferme Europæ tenent, atque ad Septemtrionem mari Germanico & Baltico, ad ortum Hungariam & Poloniam, ad Austrum Italiam & Helvetiam, ad occasum Galliam & Belgio terminatur.

2. *Qua Germania magnitudo?*

Ab occasu ortum versus ad ducenta; à Septemtrione meridiem versus ad centum quinquaginta; toto vero ambitu suo ad sexcenta milliaria Germanica complecti dicitur.

3. *Qui precipui Germaniæ fluvii?*

Hi quatuor, Danubius, Rhenus, Albis & Odera sive Viadrus. 1. Danubius omnium Europæ maximus, oritur in arce Doneschingensi Furstenbergicæ ditionis, indeque Ulmam (ubi Illam amne aucto linterium patiens est) Dilingam, Donavermam, Neoburgum, Ingolstadtum, Ratisbonam, Straubingam, Passavium, Lincium, Viennam, &c. preterfluens, amplius sexaginta fluviiis celebrioribus receptis, in Pontum Euxinum se exonerat.

2. Rhenus in monte Adula sive S. Gothardi
nis

nis fontibus, quorū Borealior *Rhenus anterior*, Australior *Rhenus posterior* nuncupatur, scaturiens, perque lacū Acroniū, qui & *Constantiensis*, *Brigantinus* & *Podamicus* appellatur, suū prosequens cursū, Scaphusiā, à qua haud procul absunt cataraetæ Rheni majores, & *Lauffenburgū*, ubi cataraetæ minores, *Basileā*, *Briſacū*, *Argentoratū*, *Spirā*, *Wormatiā*, *Moguntiam*, *Coloniā* &c. præterlabitur, donec in Belgio in alia atque alia divisus cornua inter arenarum tandem cumulos absorbetur. 3. *Albis* in Bohemia & Silesiæ limitibus nascens, *Dresdam*, *Milenam*, *Wittembergam*, *Magdeburgū*, & *Hamburgū* præterfluit, ac demū vastissimo ostio in Oceanum Germanicum se effundit. 4. *Odera* in Silesiæ & Moraviæ confinibus ortus Silesiam & Marchiā Brandeburgicā rigat, inque Pomerania citeriore in aquarū sinū sive lacum diffusus, tribus ostiis mari miscetur Baltico.

4. *Quæ porrò terra indoles?*

Frumento, vino, pascuis, pecoribus, feris, leguminibus, arborū fructibus omnis generis: metallis item & mineralibus rebusque cæteris ad vitā non commodè tantū, sed delicatè quoque ducendam abundat.

5. *Qui Germanorum mores?*

Ad artes & scientias omnes apprime sunt idonei, utpote ad quas nec ingenium ipsis, nec industria deest. *Typographiā*, *Chalcographiā*, *pulve.*

pulverem nitratum, bombardas, aliaque plurima Germani invenere. Fortitudine porro ac virtute bellica ita semper prestabant, ut idcirco Germani, quasi *porcus viri* & Allemani, *omnes viri* fuerint cognominati. Admirationi olim omnibus erat adolescentum continentia, conjugatorum fides thori inviolabilis, candor, fidelitas sinceritasque summa, & immota precipue in Orthodoxa religione constantia. Sed fidem propè superat Germanorum in fundandis dotandisque Templis, Monasteriis, Sacerdotiis, Xenodochiis, aliisque pietatis monumentis liberalitas & munificentia, quã vel saxa ipsa hodieque loquuntur. At verò laudes has plurimum obicuravit cum luctuosissima illa tot millium Germanorum ab avita fide religione que Orthodoxa defectio; tum inconsultum profusus peregrinas uti vestes, ita & mores imitandi studium. Unde aliarum nationum Simii haud injuriã appellari solent, qui utinam earundem potiùs virtutes ac prerogativas, quàm vitia & abusus æmulari studerent.

6. *Quæ in Imperio Germanico regiminis forma?*
Monarchica, Aristocratica permixta.

7. *Quæ ibidem Religio?*

Fuit hæc inter præcipua inclytæ Germaniæ decora, quod jam inde à tempore illo, ex quo nomen dare cœpit Religioni, Catholicæ, constantiã ferè Germanã in eadem semper permanferit immota,

immota, *fidei ac labii unius*, quoad Lutherus impia novarum rerum molitione confusione plusquam Babylonicâ & chaos horrendum invexit. Unde factū, ut in luctuosissima illa rerum omnium, conversione ac perturbatione lecta quoque Lutherana & Calviniana pluribus in locis Religionem Catholicam antiquissima sua statione, quam per tot sæcula tenuit, dejecerit.

8. *Qui Ordines, Statusque Imperii Romano-Germanici?*

1. Imperator tanquam Caput. 2. Electores Sacri & Profani. 3. Archiepiscopi & Episcopi. 4. Ordinum Magistri. 5. Duces ac Principes laici. 6. Principes Abbates & Præpositi. 7. Abbates & Antistites non Principes. 8. Imperii Comites. 9. Equites & Nobiles. 10. Urbes Imperiales.

9. *Que Imperii Germanici divisio?*

Hoc Maximilianus I. Anno 1512. divisit in decem, ut vocant, *Circulos*, quorum tres, Austriacus nempe, Bavaricus, & Svevicus Danubio; tres, Rhenanus nimirum Superior & inferior, ac Westphalicus Rheno; tres item, Franconicus, Saxonie Superior & Inferior Mæno, Albi & Oderâ fermè circumscribuntur. Circulum Burgundicum, qui Burgundie antehac Comitatus, à Gallis postea occupatus, & Belgii Provincias tum Batavorum defectione, tum armis Gallicis ab Imperio magnam partem avulsas, complecter

plectebatur, silentio prætermittimus. Circuli
hujus Director erat Hispaniæ Rex.

I.

Circulus Austriacus.

1. *Quæ Regiones hoc Circulo continentur?*

I. Archiducatus Austriæ, qui dividitur in superiorem & inferiorem. Hæc infra, illa supra Anasum est. Mediam interfluit Danubius, cui Anasus infra urbem cognominem se miscet Austriæ inferioris, totiusque Imperii Germanici, metropolis est Vienna, Imperatoris Regiâ, Archiepiscopatu, Academia, propugnaculis &c. longè celeberrima.

II. Ducatus Styriæ, in superiorē & inferiorē divisus, Inferioris totiusque Ducatus Caput est Græciū ad Muram amnē, arce, propugnaculis, Academia &c. celebris. In superiore Styria est Judenburgum, Seccovium Episcopi sedes, Maria Cella celestibus favoribus & prodigiis celebratissima. Ducatui quoque huic annexus est Comitatus Cillejensis, cujus urbs primaria Cilleja ad Savum.

III. Ducatus Carinthiæ, superior & inferior, ubi Episcopus Gutcensis & Lavantinus. Urbs princeps est Clagenfurtum.

IV. Ducatus Carniolæ, cujus caput Labacum Episcopi sedes. Memoratu dignus est Lacus Circonicensis, ubi anno eodē & piscari & frumentari

mentari & venari licet, aquis ingruente hyeme cum magna piscium copia ex abdito profliantibus; apparente vero æstate recedentibus. Huc referenda quoque sunt. 1. Marchia Vinidorum, cujus caput Metulum, in Croatia limitibus. 2. Comitatus Goritiensis, cum urbe cognomine. 3. Comitatus Gradiscanus, Comiti de Althann jure beneficiario traditus. 4. Aquileja urbs olim percelebris, hodie in solitudinē propè redacta. 5. Tergestum Urbs Istriae cum portu. 6. Flumen *Fiume*, seu Flumen S. Viti, Urbs ad sinum Carnarium.

V. Comitatus Tyrolensis, in Provinciam Athesinam, vallemque Oenanam distinctus, cujus Metropolis est Oenipontum, ubi est Academia, olim Merania Ducum Meraniae Sedes erat. Bolsanum solemnibus nundinis, Hala salinis, officinâ Monetariâ, regio Parthenone celebris est. Sunt item in hoc Comitatu duo Imperii Principes & Episcopi, Tridentinus, & Brixinensis, quorum ille Tridenti, hic Brixinae sedem habet Episcopalem.

VI. Austria Anterior sive Suevia Austriaca, ubi 1. Marchionatus Burgoviensis cum urbe cognomine, & Gunzburgo. 2. Comitatus Montfortensis, Brigantinus item & Veldkirchensis, quorum ille ab urbe primaria Brigantia, hic à Veldkirchio nomen trahit. 3. Dynastia Nellenburgica cum arce cognomine. 4. Comitatus Hohenbergensis, ubi Rottenburgum ad Nica,

rum. 5. Urbs Constantia. 6. Præfectura Provincialis Suevica, plures urbes & oppida complectens. 7. Brisgoja, cujus Caput Friburgum, urbs munitissima, ubi & Academia; item Briscum fortissimum adversus Gallos propugnaculum. 8. Quatuor urbes Sylvestres Rhenofelda, Sekinga, Lauffenburgum, & Waldishutum, quibus accedit Comitatus Hauensteinensis.

2. *Quis Circuli Austriaci Director?*

Imperator ipse tanquam Archidux Austriæ.

3. *Quæ ibidem Religio?*

Avita ubique Religio Catholica nunc floret.

4. *Quæ alia insuper Regiones Domui Austriacæ sunt subjectæ?*

I. Bohemiæ Regnum in decem & octo Circuitos distributum, cujus Metropolis Praga ad fluvium Moldavâ sita, sede Archiepiscopali, arce regia, Academiâ &c. præsignis, *Triurbs* dicta, quod ex *Nova; Vetere, & Parva* Praga constat.

II. Moraviæ Marchionatus à Moravo amne, à quo in duas ferè partes dividitur, nomen trahens, Urbes præcipuè sunt Olomutium, ubi Episcopalis sedes & Academia, & Bruna à Suecis

A. 1645. irritò conatu obsessa.

III. Silesiæ Ducatus superior & inferior in decem & septem Principatus & sex Dynastias divisus Totius Silesiæ Metropolis est Vratislavia, ubi sedes Episcopalis, & Academia, à Leopoldo I. fundata. IV. Serviæ Regnum, cujus Metropolis

trop
Tur
bit
V. S
Pos
&c.
VI.
jugo
Care
VII.
Turc
dicar
pisco
gò C
VIII
Aust
Hun
Aust
subef
am R
Sicul
niver
regio
nino
Metr
quen

Metropolis Alba Græca A. 1717. post insignem de Turcis relata[m] victoriã recuperata est cum urbibus Orsava, Semendria, Passarovicio &c.

V. Slavoniæ Regnum, cujus urbes præcipuè Posega; Essehinum, Gradisca, Petrovaradinum &c. cum Comitatu Sirmienti, urbeque cognomine, ubi Episcopi sedes.

VI. Croatia Regnum, cujus pars etiamnũ sub jugo Turcico gemit. Urbes præcipuè sunt Carolo stadium, Zagrabia, ubi Episcopi sedes & Academia, Castanovicium &c.

VII. Dalmatiæ Regnum, ex quo etiam Veneti, Turcæ & Respublica Ragulana sibi partẽ vindicant. Austriacis subest 1. Urbs Senia, ubi Episcopi sedes & portus ad sinum Carnariũ vulgò *Carnero*. 2. Bucaris urbs, ubi portus insignis, mercimoniis recens destinatus.

VIII. Bosniæ Regni pars, Savi ripis adjacens, Austriæ cessit pactis Passarovicensibus. IX. De Hungaria. X. Et Transylvania. XI. Et Belgio Austriaco infra dicetur. In Italia Austriacis subest. XII. Neapolitanum Regnum, quod etiam Regnum Siciliæ cis Pharus, seu fretum Siculum, dicitur, in quatuor majores atque universè in duodecim Provincias distributum, regio fertilis admodũ & culta, atque ab Apennino monte in duas ferè partes secta. Regni Metropolis est Neapolis, urbs amplissima & frequentissima, Archiepiscopi & proregis sedes.

—Sunt

Sunt in hoc Regno Archiepiscopatus 20. Episcopatus 107 & urbes 1580.

XIII. Sicilia, seu regnum Siciliæ trans Phariū, tribus promontoriis terminatur; unde & Trinacria à tres & summitas, promotorium, dicitur, dividiturque in tres Provincias seu valles. Urbes præcipuæ sunt Messina Proregis sedes, & Panormum. Utrobique Archiepiscopus Sacris præest. Vino, frumento, fructibus &c. ita abundat, ut Italiæ horreum ac promptuarium jure appellari possit.

II.

Circulus Bavaricus.

1. *Quinam Circuli hujus Directores?*

Electoꝝ Bavarus (qui & circuli Dux) & Archiepiscopus Salisburgensis.

2. *Quæ Regiones Electoꝝi Bavarico subjectæ?*

1. Ducatus Bavaricæ in superiorem & inferiorem divisus. Superioris, totiusque Bavaricæ Metropolis & Electoꝝis sedes est Monachium ad Illaram; dein Burghusium ad Salzam, ubi *Regimen*, ut vocant; Electorale, Ingolstadium ad Danubium, ubi Academia, Landsperga ad Licum, Neo-Oettinga ad Oenum. Inde haud procul abest Oettinga vetus, sacris peregrinationibus ad Thaumaturgam Deiparæ statuam à mille amplius annis longè lateque celebratissima. In inferiore Bavaria eminent urbes Landshutem

& Strau-

20. *Episcopi* & *Straubinga* cum *Electoralibus* utrobique *Regimine*, *Ratisbona* item, *Regū* olim & postea *Bavaricæ* sedes &c. 2. *Palatinatus superior*, cujus *Metropolis* cum *Electoralibus* *Regimine* est *Amberga*. 3. *Landgraviatus Leuchtenbergensis* cum urbe *Pfreimbda*. 4. *Comitatus Camensis*, *Breitenekensis*, &c. 5. In *Svevia*, *Dynastia Mindelhemienfis*, *Comitatus Wisensteigenfis*, *Donawerda*, olim *Imperialis*, *Wemdeinga* &c.

3. *Quinam in hoc Circulo status Ecclesiastici?*

I. *Archiepiscopus Salisburgensis*, *Legatus Pontificius* natus, *Germanicæ Primas* &c. *Metropolis* sedesque *Archiepiscopi* est *Salisburgū*, ubi & *Academia*. II. *Episcopus Frisingensis*. *Urbs* sedesque *Episcopalis* est *Frisinga*. III. *Episcopus Rarisbonensis*, cujus *Dioecesis* olim late per *Bohemiam* protendebatur. *Sedes Episcopi* est *Ratisbonæ*. IV. *Episcopus Passaviensis*. *Urbs* sedesque *Episcopiscopi* est *Passaviū* seu *Patavia*, *quadrifariā* *divisa*, nempe in *Passaviū*, *Instadium*, *Ilzstadium* & *Oberhusium*. V. *Princeps*, *Præpositus Berchtolsgadensis*, *Canonicorum Regularium S. Augustini*, cui *urbs Berchtolsgada* cum *adjacente tractu* subest. VI. *Princeps Antistitæ Monasterii*, ut vocant, *Inferioris & superioris Ratisbonæ*. VII. *Abbat*, *Cæsarenensis*, & ad *S. Emmerami Ratisbonæ*.

4. *Qui reliqui Status Saculares?*

I. *Dux Neoburgicus*, cujus *Ducatus* hinc qui-

dem juxta Danubium, ubi Neoburgum, Ducis
 sedes Lavinga, Mochstadium &c. illinc verò
 per Palatinum superiorem, ubi Schwandorf-
 firm, Hilpoltsteinium &c. porrigitur. II. Dux
 Sulzbacensis è Domo Palatina Neoburgica, cu-
 jus sedes est Sulzbachium in Palatinatu superio-
 re &c. III. Princeps Lobkowizius, ob Comita-
 tum principem Sternsteinensem in superiori
 itidem Palatinatu. IV. Comites, Hoheuwalde-
 kensis & Maxlerainius in superiore, & Ortem-
 burgicus in inferiore Bavaria. Comitatu por-
 rò Sulzbergensem in Palatinatu superiore Co-
 mites Wolfsteinenses, nuper extincti, possede-
 re. V. Urbs Imperialis Ratisbona.

5. Qua in hoc Circulo Religio?

Ubique Catholica, si paucos illos exceperis,
 qui in Comitatu Ortemburgico, & Sulzber-
 gensi, urbeque Ratisbona ab avita orthodoxa-
 que Religione descivère.

III.

Circulus Suevicus.

i. Qui Status Ecclesiastici in hoc Circulo?

I. Episcopus Constantiensis, cujus Diœcesis lon-
 gè olim latèque patens, hæreticorum postea ab-
 ovili Christi secessione haud parùm fuit dimi-
 nuta. Sedes Episcopalis est urbs Marisburgum
 trans lacum Constantiensem. II. Episcopus
 Augustanus, cujus sedes Episcopalis alias in ur-
 be Di-

be **Bilinga**, ubi Academia. III. Episcopus **Cu-**
riensis, magnis olī abundans proventibus; qui
 tamen post Grisonum à vera fide defectionem
 plurimum fuere accisi. Sedes Episcopi est **Cu-**
ria, urbs Rhetiae primaria. IV. Princeps **Ab-**
bas Campidunensis Ordinis S. Benedicti, qui
 perpetuus est Imperatricis *Archi-Mareschallus*.
 Principis territorium est in Algoja circa Jlarū
 amnem. V. Princeps Præpositus **Elvacensis**,
 cujus est Elvacum urbs cum circumjacente tra-
 ctu. VI. Præpositi & Abbates 1. Ord: S. Augu-
 stini Canonici Regular: **Wettenhusang**. 2. Ord:
S. Benedicti Elchingensis Gengeubacensis, Ir-
singensis, seu Ursineasis, Isnensis, Ochsenhu-
sanus, Ottoburanus, Petershusanus, SS. Udal-
rici & Afræ Augustæ Vindelic: Weingartensis,
Zwifaltensis. 3. Ord: Cisterc: Salemitanus. 4.
Ordin: Præmonstr: Marchtalensis, Rodensis,
Roggenburgensis, Schuffenriedensis, Ursper-
gensis, Weissenaviensis sive Augiæ minoris.
 VII. Principes **Antistitæ nobilium Virginum,**
Buchaviensis ad lacum plumarium, & Linda-
viensis in Urbe Imperiali Lindavia. VIII. An-
tistitæ Baintensis, Guttencellensis, Heggenba-
censis, & Rubromonasteriensis, Ordinis omnes
Cisterciensis.

2. *Qui Status Saculares?*

I. Dux **Württembergicus**, cujus sedes urbsque
 primaria est **Stutgargia**. II. **Marchiones Baden-**

fis & Durlacensis. Badensi Marchionatus superior, cujus urbes primariæ Badena, Rastadiū &c. Durlacensi verd subest Marchionatus inferior, ubi Durlacum, Pforzpeimū &c. Marchionatus superior religioni adhæret Catholicæ, inferior Lutheranæ, uti & Wiirtembergiæ Ducatus. III. Principes Hohenzolletanus, Hechinganus, & Sigmaringanus, Religionis uterque Catholicæ. IV. Principes Fürstenbergenfes, Möskirchenfis & Stüligenfis, itidem Catholicæ. V. Princeps Oettinganus qui solus ex antiquissima hac familia Lutheræ adhæret. VI. Præter Comites Oettinganos in tres stirpes Wallersteiniam, Spilbergicam & Balderanam divisos, Circulo huic adscripti sunt Comites Fuggeri, Graveneggii, Hohenemsii, Justinngenses sive Freybergii, Königseggii, Montfortii, Pappenheimii, Rechbergii, Truchsessii de Wadldburg Wolfegg Zeil &c. VII. Urbes Imperiales Catholicæ sunt Buchavia, Buchornia, Cella, Gamundia, Gengenbachium, Offenbutgum, Pfullendorffium, Rottwilla, Uberlinga, Wangina & Willa. Mixtæ Religionis Augusta Sueviæ Metropolis, Biberacū, Dünckelspühlia, Kauffburs, Leutkirchium, & Ravenspurgum, Lutheranæ Alena, Bopfinga, Campidunū, Ellslinga, Gienga, Hala, Heilbrunna, Isnia, Lindavia, Memminga, Nordlinga, Reutlinga, Ulma, & Wimpina.

3. *Qui Circuli hujus Directores?*

Episcopus Constantiensis & Dux Würtembergicus, qui & Circuli Dux est.

IV.

Circulus Rhenanus superior.

1. *Qui Status Ecclesiastici?*

I. Episcopus Wormatiensis. II. Episcopus Spirensis. III. Episcopus Argentoracensis. IV. Episcopus Basileensis, qui postquam Basilea veram Religionem abjuravit, Bruntruti sedem fixit Episcopalem. Episcopatus porro Metensis, Tullensis & Virodunensis, pridem Gallis cedere. V. Princeps Abbas Fuldensis Ord. S. Benedicti, perpetuus *Archi Cancellarius* Imperatricis, & Abbatum per Germaniam & Galliam *Primus*. Principis porro Abbatia Prumensis possessionem pridem adiit Elector Trevirensis. VI. Magnus Equitum Melitensium *Prior* per Germaniam, cujus sedes est Heitershemii in Brischoja VII. Princeps Antistita Andlaviensis in Alsatia inferiore.

2. *Qui Status Saculares?*

I. Comites Palatini Rheni, Bipontinus, & Bircfeldensis Comitatus porro Veldentianus & Simmerensis sub Electoris Palatini ditione est. II. Landgravii Hassiæ, quadrifariam divisi, nempe in Casselanos, Darmstadianos, Rhenofeldenses & Homburgenses. Hasso-Casselanus possidet 1. potiore Hassiæ inferioris partem,

D3

2. In

3. *Qui*

2. In Hassia superiore Marpurgū, aliasque Urbes. 3. Principatum Hirschfeldia, insignem olim Abbatia &c. Hasso Darmstadianus potissimam Hassia superioris partem obtinet cum urbe Gissa; Comitatum item Cattimelibocensem superiorem, cujus Caput Darmstadium, Hasso Rhenofeldensis tenet Comitatum Cattimelibocensem inferiorem; in Hassia verò inferiore Rottemburgum, Landgravii Rottemburgensis, & Wanfridam. Wanfridenfis sedam &c. Hasso Homburgensi subjecta est urbs Homburgum in Hassia superiore. III. Principes Nassovia, in sex ramos divisi, nempe in Dietiensem, Dillemburgensem, Hadamariensem, Idsteinensem, Sigenensem, & Usingensem, cum Comitibus Sarbrukensibus, Ottweileranis & Vilburgensibus. Omnes hi nomen ducunt à Principatu urbeque primaria Nassovia, suntque partim Catholici, partim Aetholici. IV. Princeps Comitatus Montis Bellicardi, Duci Würtembergia subjectus. V. Princeps Salmensis & Princeps Waldensis. Comes item Hanovienfis, cujus est Hanovia, ampla, munitaque Wetteraviae urbs. VI. Comites Hazfeldenses, Henburgici, Leiningenses, Saynenses, & Wittgensteinenses Solmenses, Wiedenses, Wild & Rheingravii &c. VII. Urbes Imperiales Wormaria, Spira, Fridberga, Wezlaria, Gelnhusium & olim Argentina, aliaque Alsatiae urbes nunc

nunc Gallicæ omnes ditionis. Duces quoque Sabaudix & Lotharingix Circulo huic sunt adscripti.

3. *Qui Circuli hujus Directores?*

Episcopus Wormatiensis & Landgravius Hassio-Casselanus.

V.

Circulus Rhenanus inferior seu Electoralis.

1. *Qui Circuli hujus Status Ecclesiastici?*

I. Archiepiscopus & Elector Moguntinus, qui possidet 1. ditionem Moguntinam, 2. Stradā, Montanam, 3. Eislefeldix tractum, 4. Erfordiam, Thuringix metropolim cum tractu adjacente, 5. Frislariam, Ameneburgum &c. in Hassia inferiore. 6. Alschaffenburgum, Gerreshemium &c. II. Archiepiscopus & Elector Trevirensis, cujus præter Treuitos, metropolim, est Confluentia, ubi Mosella Rheno jungitur, Vesalia superior, Prumia cum Abbatia principe, Sarburgum &c. III. Archiepiscopus & Elector Coloniensis, cujus sedes Electoralis Bonna. Idem præter alia possidet quoq; Westphaliæ Ducatū.

2. *Qui Status Saculares?*

I. Elector Palatinus, cui subest 1. Palatinatus Rhenanus sive Inferior. 2. Ducatus Neoburgicus in Circulo Bavarico. 3. Ducatus Juliacensis & Ducatus Montanus cum Dynastia Ravensteinensi in Circulo Westphalico &c. II.

Princeps Arembergicus, cujus Principatus
urbsque Aremberga in Eiffalia. III. Comites
Sleidani, Manderfcheidenses, Reifferscheidenses,
& Virneburgenses, omnes itidem in Eiffalia.

3. *Quis Circuli hujus Director, & Dux?*

Director est Elector Moguntinus, Dux vero Elector Palatinus.

VI.

Circulus Westphalicus.

1. *Qui Status & Ordines Ecclesiastici?*

I. Episcopus Monasteriensis. II. Episcopus
Leodiensis. III. Episcopus Paderbornensis. IV.
Episcopus Osnaburgensis. Verdensem porro
Episcopatum Svecus primum, ac nuper Han-
noveranus; Mindensē verò Brandeburgus oc-
cupavit, profani utrumque juris factum in pa-
cificatione Westphalica. V. Abbates Principes
Corbejensis & Stabulensis. Abbas item Ver-
densis & Cornelienfis. VI. Princeps Antistita
Essendiensis, & Abbatissa Burscheidensis. Prin-
ceps porro Antistita Herfordiensis Calvino
adhæret.

2. *Qui Status Seculares?*

I. Dux Juliacensis. II. Dux Montensis. III.
Dux Clivensis. Ducatum Juliacensem & Du-
catū Montensem, cujus metropolis Dusseldor-
pium, possidet Elector Palatinus; Clivensem
verò cum Comitatu Marchiæ, & Comitatibus

Revens-

Revensbergenti, Lingensi &c. Elector Brande-
 burgicus. Westphaliæ porro Ducatus Electori
 Coloniensi est subjectus. IV. Princeps Frisiæ
 Orientalis. V. Comites Bentheimenses, Bron-
 chostii, Lippienses, Reckheimenses, Styrumii,
 Tecklenburgici, Vechlenses &c. Plures alios
 Circuli hujus Comitatus possident Rex Daniæ,
 Luneburgici Hassi &c. VI. Urbes Imperiales,
 Colonia, Aquisgranum, Tremonia.

3. *Qui Circuli Directores?*

Episcopus Monasteriensis & Dux Juliacensis
 cum Cliveni alternatim.

VII.

Circulus Franconicus.

1. *Quinam Statu Ecclesiastici?*

I. Episcopus Bambergensis, cui & in Carinthia
 loca quædam subjecta sunt. Episcopus Herbi-
 polensis, qui & Dux Franciæ Orientalis. III. E-
 piscopus Eustadianus. Urbs Princeps est Eusta-
 dium ad Almonum amnem. IV. Magister E-
 quitum Teutonicorū, cujus sedes est Mergen-
 themii ad Tuberum amnem, postquam E-
 quites Teutonici ex Borussia commigrare sunt
 compulsi.

2. *Qui Status Saculares?*

I. Marchio Byruthanus seu Culembacensis. II.
 Marchio Onoldinus sive Anspacensis. Uterq;
 hic Marchionatus Luthero adhæret. III. Prin-
 cept

ceps Schwarzbergensis, & princeps Löwenste-
 inius sive Werthemienfis. Princeps porro Co-
 mitatus Hennebergicus inter Saxoniz Duces
 est divisus, excepta Smalcaldia urbe, quæ Hal-
 so Cassellano cessit. IV. Comites Castellani,
 Dernbacenses, Erapacenses, Limburgenses,
 Hohenlogici, Reinecani, Schenbornii &c. V.
 Urbes Imperiales Norimberga, Francofurtum
 ad Mœnum, Schweinfurtum, Rottemburgum
 ad Tuberam, Weissenburgum, & Winsheimium.

3. *Qui Circuli Directores?*

Episcopus Bambergensis, & Marchio Byrutha-
 nus, qui & circuli Dux est.

VIII.

Circulus Saxoniz Superioris.

1. *Qui Circuli hujus Directores?*

Electoꝛ Saxoniz (qui & Dux Circuli) & Ele-
 ctoꝛ Brandeburgicus.

2. *Quæ Provincia Electoꝛi Saxoniz subjecta*

1. Saxonia propria sive Electoralis in septem
 Circulos, Electoralem nempe, Thuringicum,
 Misniensem, Lipsiensem, Nontanum, Voigtlan-
 dicum & Neustadianum divisa. 2. Lusatia su-
 perior &c. Electoꝛis sedes Dresda ad Albim.

3. *Quid in hoc Circulo Electoꝛ Brandeburgicus
 possidet?*

1. Marchiam Brandeburgicã, quæ in *Veterem,
 Novam, Mediam, & Ckeraniam* &c. distribui-

tur. 2.

öwenste- tur. 2. Pomeraniam ulteriorem, partemque
 orrò Co- citetioris cum Principatu (olim Episcopatu)
 & Duces Caminensi, aliisque. Electoris sedes Berolinū
 quæ Haf- ad Spreham amnem.

4. *Qui Status Ecclesiastici?*

Florebant olim in hoc Circulo Episcopatus
 &c. V. Misnensis, Merseburgensis, Naumburgensis,
 cofurtum Brandeburgensis, Havelbergensis, Caminensis
 nburgum & Lebusiensis. Abbatix item Principes Saal-
 nsheimiū feldensis, Quedlinburgensis & Gerenrodensis
 ? &c. nunc profani omnes juris. Nam Misnen-
 Byrutha sem, Merseburgensem & Nauburgensem Epi-
 scopatum cum Abbatia Saalsfeldensi Saxonix
 Duces, Reliquos verò Episcopatus Elector Bran-
 deburgicus occupavit. Quedlinburgense & Ge-
 renrodense cœnobium Abbatissix, ut vocant,
 is. Lutheranz incolunt, ut plura alia monasteria
 s? silentio involvam.
) & Ele

5. *Qui reliqui Status Saculares?*

subjecta I. Saxonix Duces, Weiffenfelsenses, Mersebur-
 n septem genses, Vinarienses, Isenacenses. & Gothani
 ingicum. in plures ramos divisi. II. Principes Anhalti-
 Voidan- ni, Dessavientes, Bernaburgenses, Cœthenses &
 usatia su- Servestenses. III. Principes Schwarzburgici,
 d Albim- Sondershusiani & Rudelstadiani: Princeps itē
 burgicus Fundanus, qui Mansfeldix Comes, Catholicus.
 Veterem IV. Comites Barbientes, Gleichenses, Hohen-
 distribui steinii, Reussenses, Schœnburgici, Stolbergen-
 tur. 2. ses &c.

IX.

Circulus Saxoniae Inferioris.

1. *Qui Circuli hujus Directores?*

ArchiEpiscopi Magdeburgensis & Bremensis,
In quorum locum successere Electores Brande-
burgicus & Hannoveranus.

2. *Quae Electoris Hannoverani Provinciae?*

1. Ducatus Luneburgicus. 2. Principatus Calen-
bergensis sive Hanoveranus, ubi Hannoveranus
Electoris sedes. 3. Principatus Grubenhagenensis
&c. praeter Ducatum (olim ArchiEpiscopatus)
Bremensem &c.

3. *Qui Status sive Ordines Ecclesiastici?*

Ex tot Circuli hujus Episcopatibus, Magdebur-
gensi nempe & Bremensi, Halberstadiano, Sver-
rinensi, Slesvicensi, Lubecensi & Raceburgen-
si, solus Hildesimensis in pristina Juris & Juris-
dictionis sacrae possessione, fideque orthodoxa
adhuc persistit, posteaquam in Pacificatione
Westphalica ArchiEpiscopatus Magdeburgi-
cus cum Episcopatu Halberstadiano Electoris
Brandenburgico; ArchiEpiscopatus Bremensis
Sveco primum, ac pronuper Hannoveranus
Episcopatus Sverinensis & Raceburgensis Du-
cibus Megalopolitanis celsere. Episcopatum
porro Lubecensem Princeps Lutheranus et
Holfatiae Ducibus Gottorpianis, quem Episco-
pum vocant, administrare solet; Slesvicensem
vero Rex Daniae tenet.

4. *Qui*

4. *Qui reliqui Status Seculares?*

I. Dux Guelpherbytanus, cujus est Ducatus Brunsvicensis &c. Domus item Beverana & Blanckemburgensis ex eadem Ducum familia.

II. Duces Megalopolitani, Sverinensis & Strelitienensis. Sverinensis possidet Ducatum Megalopolitanum, Principatum Vandalia, Principatum & Comitatum Sverinensem, Rostochiense Dominium cum urbe Rostochio; Strelitienensis verò Principatum Raceburgensem & Dominium Stargardiense &c. III. Dux Slesvicensis & Dux Holsatia. Uterque hic Ducatus inter Dania Regem, Ducemque Holsatia est divisus. Urbes Imperiales Hamburgū, Lubeca, Brema, Goslaria, Mülhusum, & Nordhusum.

§. II.

De magna Peninsula Scandia sive Scandinavia.

Quae haec Europa pars?

Extrema Septemtrionem versus, Sveciam & Norvegiam complectens. Nos Daniam quoque adjungimus, utpote conterminam, & eisdem, cui Norvegia, Domino subjectam.

S V E C I A.

1. *Qui Sveciae Limites?*

Ad Septemtrionem Lappia, Norwegica, ad Ortum Moscovia, ad Austrū mari Baltico & Curlandia, ad Occalum Norvegia clauditur.

2. *Qua.*

2. *Quæ Aquæ?*

Mare Balticum, sinusque Bothnicus & Finnicus, cum multis lacubus locisque paludosis,

3. *Quæ Aura?*

Perfrigida; attamen, in parte præsertim Australi, ubi pauciores sunt paludes, pura, oppidoque salubris, ita ut non rarò incolæ vitæ ultra centum annos producant; Pars porrò Septentrionalior ob crebras paludes insalubris est.

4. *Quæ soli fertilitas?*

Id de Europa universa generatim dicendum: regiones Boreales eò minùs esse frugiferas, quò propiùs ad Polum accedunt; contra quò longiùs inde recedunt, eò esse fertiliores. Superiorem igitur Sveciæ tractus eùm ob frigoris inclementiam, tum ob frequentes paludes sterilis admodum est. Australior verdò, non obstante sex mensium peracri hyeme, tritico, pascuis, sylvis cervis, alcibus, mustellis alpinis &c. abundat. Nec usquam æris venas opulentiores reperiri.

5. *Quæ præcipua Sveciæ partes?*

1. Gothia, 2. Svecia propriè dicta, 3. Lappia Svecica, 4. Finnia. Ingria porrò & Livonia præteritionis hodie sunt Moscoviticæ.

6. *Quæ Regni Metropolis?*

Holmia, quæ multis e mari prominentibus scopulis cingitur.

7. *Qui Svecorum mores?*

Sunt frigoris, inedia, laboris patientes, robusti

busti, bellicosi; imò & truculenti. Id quod maximo suo damno experta est Germania centū abhinc annis, quando in patriæ, religionisque orthodoxæ excidium Sveci, à Germanis heterodoxis evocati, immanitate plus quàm barbarâ sævière in Catholicos.

8. *Quæ Regiminis forma in Svecia?*

Olim nihil gravioris momenti licebat Regi suscipere quin prius quatuor regni ordines nempe Ecclesiasticorum, Nobilium, Civium & Rusticorum in consilium adhiberet, quoad annò 1680. Carolo XI. suprema ab iisdem potestas est concessa; qua tamen à Carolo XII. obitu Ulrica Eleonora, Regis defuncti soror, cum Frederico Hasso Casselano, thori regnique consortē, se denuò abdicavit.

9. *Quæ ibidem Religio?*

Lutheri ubique doctrina, velut Evangelium, recepta est.

N O R V E G I A.

1. *Qui Regni hujus termini?*

Ad Septentrionem & Occidentē Oceanus Germanicus. ad Meridiē sinus Scagensis seu Danicus, ad Ortum perpetuus montis tractus quo à Svecia sejungitur.

2. *Quæ Aqua?*

Occidentem versùs in Oceano Germanico est vortex sive Euripus omnium maximus (vulgò Mel

Mal Strom) qui naves onerarias & vicina quæque absorbet.

3. *Quæ terra insoles?*

Regio hæc ob deserta & inhospita tesqua, horridaque montium altissimorū juga partem potissimam aspera est & inculta; frugum tamen sat ferax, ubi solum culturæ patiens est. Arbores ibi prægrandes, malis navibusque frabricandis aptissimæ; æris item, magnetis, picis, pellium, ac piscium; asellorum præcipue marinorū, qui in vicino mari capiuntur, magna copia.

4. *Quæ Norwegia partes?*

Sex complectitur provincias, 1. Bahusiā, quæ Svecorum est. 2. Aggerhusiam, 3. Bergensem, ubi Berga metropolis, Regii Præfecti sedes, 4. Stavangriam, 5. Nidrosiam, 6. Wardhusiam.

5. *Qui Norvegorum mores?*

Gens est rudis; in arte tamen fabrili probè exercitata, algoris, inediæ ac laboris tolerans, piscatuque & venatione ut plurimum victitans.

6. *Quæ eorundem Religio?*

Et hi Lutheri placita, tanquā dogmata Evangelica, amplectuntur.

7. *Qui qualesque Lappones?*

Hi triplicis sunt generis. 1. Qui ad Boream sunt remotissimi, Daniæ Regi parent. 2. Qui ad ortum habitant, sub Moscorum sunt Imperio. 3. Reliqui iique potiores sinum Botchnicum versus, Sveciæ Regi subsunt, genus hominū barbarum,

barū
fame
tur
mult
his,

Ad S
man

Præ
liis C
ciam
Balti
cū m
rum
diam
Scan
angu
sint
tutū

Aura

i. Ju

barū, sylvestre, superstitiosū, ac veneficiis infame, qui ventos navigaturis vendere dicuntur. Equorum loco rangiferos, cervis haud multū abfimiles, vehiculis jungunt, seu trahis, quibus brevissimo temporis spatio maxima conficiunt itinera.

D A N I A.

1. *Quæ Regni hujus confinia?*

Ad Septemtrionem & Occidentem mare Germanicum, ad Orientem sinus Scagensis, & mare Balticum, ad Austrum Holsatia.

2. *Quæ Aqua?*

Præ cæteris memorandus sinus Scagensis (aliis Codanus, aliis Danicus,) Jutiā inter & Sueciam ac Daniæ insulas, ex quo triplex in mare Balticum transitus, nempe 1. per fretum Balticū minus Jutiam inter & Fioniam, 2. per fretum Balticum majus Fioniam inter & Selandiam, 3. Per fretū Sundicū (inter Helsingam Scaniæ & Croneburgum Selandiæ urbem) tam angustum, ut tormentis utrinque inaccessi possint navigia, quæ hinc vela demittere, & constitutū à Daniæ Rege portoriū pendere coguntur.

3. *Quod Cali solique ingenium?*

Aura perfrigida est; terra frumento, pascuis, equis, ferisque abundat.

4. *Quæ Dania Provincia?*

1. Jutia peninula, olim Cimbrica Chersonesus,

E

sus,

fus, 2. Selandia & Fionia Insulæ majores, cum multis aliis minoribus.

5. *Quæ Regni Metropolis?*

Hafnia in insula Selandia, ubi portus insignis.

6. *Qui Danorum mores?*

Navigationibus etiam remotis jam olim affveti, mercimoniis præcipue dant operam, ad scientias æquè atque arma tractanda indones.

7. *Quod Regimen?*

Monarchicum.

8. *Quæ Religio?*

Verâ Evangelii doctrinâ repudiata, Lutherò adhaerere, non paucis tamen Catholicorum ceremoniis retentis.

§. III.

MOSCOWIA.

1. *Qui Moscoviæ fines?*

Ad Septentrionem mare habet glaciale, ad Occidentem Lappiam Norvegicam, Poloniam & Sveciam, ad Austrum Tartariam minorem, Circasiam, mare nigrum & Caspiû, ad Orientem Tartariam majorem sive Asiaticam.

2. *Quæ Aquæ?*

Fluvii Volga, Obius, Tanais, Dzvina &c. Lacus Ladoga longus 36. latus 20. miliaria Germanica, & Lacus Onega, qui longitudine 50. latitudine 18. miliaria complecti dicitur.

3. *Quæ terra indoles?*

Regio

Regio hæc spatii ingentibus diffusa in mediterraneis fere plana est; ad oras verò maritimas in montes assurgit altissimos, plena passim sylvis, lacubus, & majoribus fluminibus, quorū aquæ ingenti labore sumptuque, at non minore operæ pretio compendioque per factitios alveos sive *Canales* jungi nuper, committique cœpère, ut inde in mare Balticum & Caspium, Pontumque Euxinum navibus liber pateat accessus. Aura potiorem anni partem frigidissima est, quam æstas subinde excipit tam fervida, ut serant alicubi ineunte Junio, Julio exeunte metant. Feris syvæ abundant. Loca deserta non pauca, in Syberia præsertim, ubi pretiosæ mutium Ponticorum & Mustelaram Scythicarum pelles, quas ut integras servant, bestiolas illas telis obtusis, inque nasum ferè directis dejiciunt ex arboribus.

4. *Qua Moscoviæ partes?*

Quatuor præcipuæ. 1. Russia Occidentalis. 2. Russia Orientalis. 3. Tartaria Moscovitica, 4. Lappia Moscovitica, quibus aliæ multæ Provinciæ, nuper Svecis ereptæ accessêre, nempe Livonia, Ingria, Careliæ pars, ubi mediis in aquis Sinus Finici ad Nievæ ostium A. 1703. ædificari cœpta est urbs longè munitissima Petersburgum, ut taceam urbes regionesque alias Persico bello partas.

5. *Qua Metropolis?*

Et

Moscuæ,]

Moscua, quæ omnium Europæ urbium amplif-
sima esse perhibetur, ad Moscum amnem.

6. *Qui incolarum mores?*

Gens hæc rudis omnino erat, barbara & incul-
ta, quoad Petrus I. post varias Europæ regio-
nes peragratas bonarum artium disciplinas,
cùmque his mores pariter cultiores politiores-
que hæc in terras cœpit invehere.

7. *Quæ ibidem regiminis forma?*

Imperiosa prorsus ac despotica; nam subjecti
omnes perinde habentur atque mancipia, quo-
rum & bona omnia, & vita ipsa è Czari pendet
arbitrio. Neque plebeii solùm sed & optimates
ob levia sæpe delicta si non morte, fustuario
certè multari solent.

8. *Quæ Moscorum Religio?*

Hi cum Græcis Schismaticis fermè conveniunt

§. IV.

POLONIÆ REGNUM.

1. *Quæ Regiones conterminæ?*

Ad Septemtrionem Borussia, Curlandia & Li-
vonia cum Moscoviæ parte, ad Ortum itidem
Moscovia, ad Occidentè Silesia, Marchia Bran-
deburgica & Pomerania, ad Austrum Valachia
a, Transylvania & Hungaria.

2. *Qui fluvii præcipui?*

Vistula Cracoviam, Varsaviam, Thoruniũ &c.
alluens, infra Dantiscum mare subit Balticum.

Bory-

Borysthencs verò & Tyras in Pontum Euxinū
sefe exonerant.

3. *Qua Celi affectio locique natura?*

Aër perfrigidus quidē, sed salubris, nisi quòd
in Lithvanix quibusdam locis palustribus cras-
sior sit & insalubrior: Terra frumento, cera,
melle, sale, pice, metallis, pecore, jumentis,
feris, ac piscibus omnis generis abundat.

4. *Qua praecipua Regni Poloniae partes?*

1. Polonia propriè dicta, 2. Magnus Litvanix
Ducatus, 3. Borussia regalis sive Polonica &c.

5. *Qua Regni hujus Urbes praecipuae?*

Cracovia regni totius, Vilna Lithvanix me-
tropolis est, Varavia Regum sedes.

6. *Qui Polonorum genius?*

Sunt fortes & animosi, atque adversus Turcas,
aliosque Ecclesix hostes prorsus intrepidi, e-
quo ut plurimum mereri soliti, nobilitatis a-
vitæque libertatis apprimè tenaces &c.

7. *Qua regiminis forma?*

Partim Monarchica, partim Aristocratica cum
Democratica permista.

8. *Qua Religio?*

Catholica; tolerantur tamen alicubi Luthera-
ni, Calvinistæ, aliique Sectarii, quos *Dissidentes*
vocant. Plura de Polonia disces ex annuis PP.
Skarga, Kwiatkiewicz, Gwagnino, Crantzio,
Floro Polonico &c.

§. V.
TURCIA EUROPÆA.

1. *Quos hac habet terminos?*

Ad Septentrionem Poloniam & Hungariam; ad Ortum Pontum Euxinum; ad Austrum Mediterraneum; ad Occasum mare Adriaticum.

2. *Qua præcipua ejusdem partes?*

1. Bulgaria, Bessarabia, Thracia, sive *Romania*, Græciaque universa, quæ uno omnes nomine *Romelia* appellantur, atque à supremo Prefecto *Beglerberg* dicto, cujus sedes Urbs *Sophia* Bulgariae metropolis, administrantur. 2. Bosnia, Croatia, Dalmatiae & Serviae pars. 3. Insula Creta sive *Candia*, centum olim urbibus frequens, & Eubœa vulgò *Negroponte*, cum aliis Archipelagi insulis, quarum plerisque nova hodie nomina indidère. has inter est Insula *Pathmos*, sive *Palmosa*, ubi S. Joannes Apocalypsin scripsit.

3. *Qua Imperatoris Turcici sedes?*

Adrianopolis primùm, donec sedes regia Constantinopolim (Turcae *Stambol* vocant) Anno 1453, à Machomete II. captam, est translata.

4. *Qua Turcarum ingenia?*

Gens hæc atrox, truculenta & barbara, ad regnorum, bonarumque artium excidiū nata, non propria virtute, sed Principum Europæorum dissidiis, gravissimisque Pseudochristianorum

præci-

præcipuè, ipsis aded Turcis pejorum, flagitiis ad tantum dominationis fastigiũ est grassata.

5. *Quæ Turcarum Religio?*

Nefariis omnes impii Machometis superstitionibus sunt dediti, quibus immitti Schismatici Græci, DEO & Ecclesiæ rebelles, miseram ser-
viunt servitutem.

6. *Quæ celebriores antiquæ Græciæ Provinciæ?*

1. Macedonia, ubi Thessalonica, hodie *Salonichi*. 2. Albania sive *Arnaut*. 3. Epirus. 4. Ætolia, ubi Actium promontorium, 5. Achaja, nunc *Livadia*, ubi olim Athenæ urbs Academia toto orbe celeberrima, mons Parnassus, aliæque antiquitatis monimenta. 6. Thessalia sive *Fanna*, ubi Campi Pharsalici, amœnissima Tempe, mons Olympus &c. 7. Peloponnesus sive *Morea*, ubi Corinthus, Sparta &c. fuerat.

7. *Quis Græciæ hodiernæ status?*

Nobilissima hæc regio, omni antehac disciplinarum genere longè excultissima, sedes nunc est ignorantix, meraque Barbaries.

8. *Quæ terra fertilitas?*

Hæ aliæque Turcicæ ditionis Provinciæ erant olim cultissimæ, rerumque omnium affluentia refertissimæ; quæ tamen hodie ob incolarũ vel incitiam, vel inertiam magnam partem neglectæ jacent.

§. VI.
BRITANNIA.

1. *Quis hujus situs?*

Undique mari cingitur, ad Septemtrionē Ca-
ledonio, ad occasum Hibernico, ad Austrum
Britannico, ad ortū Germanico, ubi Batavi ma-
gnū quotannis quāstum ex halecum captura
faciunt.

2. *Quae Britanniae divisio?*

Insula hæc, omnium Europæ maxima, Angliæ
& Scotiæ regna complectitur, & Britannia ma-
gna appellatur. Huic Occidentem versùs ad-
jacet Hibernia, quæ cum pluribus aliis insulis
minoribus Britanniae Regi subiecta est.

3. *Qui fluvii præcipui?*

In Anglia Tamæsis, Tavus in Scotia, ubi qua-
tuor magna æstuaria, quæ Scoti *Fyrth* vocant,
in Hibernia Senus.

4. *Quae urbes primariae?*

Angliæ Londinum, Scotiæ Edenburgum He-
berniae Dublinum.

5. *Quae Cæli affectio, solique natura?*

In Anglia aura humidior, crassiorque, tempe-
rata tamen. Terra ut fertilissima, vinū tamen
non profert. Lana, stannum, & equi Anglici
præ reliquis commendantur. Asperioris & coeli
& soli est Scotia; unde minor frugum, maxi-
ma verò piscium, halecū præcipue ac Salmo-
num

num copia. In Hibernia ob crebros lacus & paludes aër gravier, minusque salubris est; praeta tamen pecoribus, lacus piscibus, maximè salmonibus, abundant.

6. *Quis incolarum genius?*

Hi quamdiu religioni veræ adhæterant, miris passim laudibus efferebantur; at postquam ab ea defecêre, toti pariter à se ipsis degenerârunt. Adcò nempe si non unica, optima certè morū magistra religio est orthodoxa, quæ si exulare cogitur, vera pariter virtus, honestas, politia &c. exulet necesse est. Quòd si populo hujusmodi fœdifrago, veræque religionis desertori ferociores insuper animi imperus natura indidit, quid, nisi casus tragicos, turbulenta, dira, funesta quæque exspectes?

7. *Quæ Regiminis forma?*

Monarchica, cum Aristocratica & Democratica permilla.

8. *Quæ ibidem Religio?*

Catholica tantopere olim floruit, ut multæ Europæ Provinciæ, ac præcipuè Germania primos orthodoxæ Fidei magistros & Apostolos Britannia debeat. At verò post horrendum illud Schisma ab Henrico VIII. Ecclesiæ DEL propugnatore primùm strenuo, dein hoste infensissimo introductum, merum diversarum sectarū chaos hodieque lugentes conspiciamus.

9. *Quis antiquæ Britannia Status?*

Hæc.

Hæc Albion primùm, tum à Romanis victori-
 bus Britannia appellata est. Præfidiis exinde
 Romanis ad Galliam defendendam avocatis,
 Britanni Anglos, Saxonum Coloniam, contra
 vicinorum hostium incurfiones in subsidium
 advocârunt à quibus strenuè primùm ad-
 juti, dein contra fidem datam patriâ pulsi,
 partim in extremum Gallix angulum sedem
 nomenque transtulêre, partî in montes Cam-
 briæ (Walliam hodie vocant) se recepêre, re-
 tenta in hanc usque diem antiquæ Britannix
 lingvâ. Britannia subinde à novis incolis An-
 glis Anglia vocari cœpta est.

§. VII.

I T A L I A.

1. *Qui ejus termini?*

Italia ocreæ figuram referens, Septemtrionem
 versùs à Germania; Helvetia & Gallia Alpibus
 submovetur; cætera verò mediterraneo undi-
 que mari cingitur.

2. *Qui fluvii præcipui?*

Padus; quem Pœtæ Eridanum vocant, Tibe-
 ris & Athesis.

3. *Qua terræ fertilitas?*

Tanta, ut Europæ Paradisus appellari haud in-
 juria possit; nam vinum generosum, poma o-
 pima omnis generis, sericum, resque alias u-
 berim suppeditat.

4. *Quæ*

4. *Qua Italiae divisio?*

In superiorem, mediam & inferiorem dividi percommode potest. In parte superiore seu Boreali septem sunt Ducatus, nempe Sabaudia, Pedemontium, Mons-Ferratus, Ducatus Mediolanensis, Parmensis, Mutinensis & Mantuanus. Tres item Respublicæ, Veneta, Genuensis, & Lucensis. In Italiae medietate ditio est Summi Pontificis, & magnus Hetruriæ Ducatus: in parte inferiore seu Australi Regnum Neapolitanum. Italiae circumjacent Insulae majores Sicilia, Sardinia, Corsica & Melita, cum minoribus quibusdam.

5. *Qua urbs Italiae primaria?*

Roma, Imperii primum profani, imò & veteris orbis universi caput; inde verò Imperii Ecclesiastici, non per veterem duntaxat, sed novum insuper orbem quaquaversus dilatati metropolis, Summi que Pontificis & Christi in terris Vicarii sedes.

6. *Qua Religio?*

Sola hic Religio Catholica sedem fixit stabilem, nullis unquam inferorum machinis evertendam.

7. *Qui Italorum mores?*

Perspicaci sagacique sunt ingenio, ac rerum omnium capaci. Dicuntur tamen astuti, subdoli, gloriae, vindictae & pecuniae tenaces non minus quam appetentes, ac medium quodammodo tenere Hispanicam inter gravitatem & levitatem Gallicam.

8. *Qua*

victori
s exinde
vocatis,
contra
bsidium
am ad-
a pulsi
a sedem
es Cam-
bere, re-
itanoniz
olis An-

trionem
Alpibus
o undi-

e, Tibe-

aud in-
oma o-
alias u-

Qua

3. *Quæ prisca Italiae divisio?*

Pars Italiae superior, ubi Pedemontium, Mediolanum, Parma &c. Gallia *Cisalpina* sive *Togata* vocabatur. Versus Dominium Venerum erat Gallia *Transpadana*; *Cispadana* autem versus agrum Florentinum. Omnis hic Italiae superioris tractus post Longobardorum irruptionem Longobardia dicta est. In Media Italia erat Hetruria sive Tuscia, Græcis Tyrrenia hodiernis Italis Toscana. Campania Romana, cujus caput Roma, majorem Latii antiqui partem continet, ubi olim Latini; Sabini, Rutuli, Volsci, &c. Ducatus Spoletanus *Umbria*, Marchia Anconitana Picenum nominabatur. In Italia inferiore erat 1. Samnium, ubi hodie Beneventum. 2. Campania felix, ubi Neapolis, Capua, Nola &c. 3. *Græcia magna*, Apuliam & Calabriam, quæ inferior regni Neapolitani pars est, complectebatur. In antiqua Calabria erat urbs Tarentum. Hodierna Calabria Siciliam versus protenditur.

§. VIII.

G A L L I A.

1. *Qui Regni hujus limites?*

A Septentrionibus mari Britannico (nautæ *Canalem*, Galli *la Manche* sive manicam vocant) parteque Belgii; ab occasu Oceano Atlantico; à Meridie montibus Pyrenæis, quibus ab Hispania

ab Hispania sejungitur, & mari Mediterraneo;
ab Ortu Sabaudia, Comitatu Burgundia, Lo-
tharingia & parte Belgii terminatur.

2. *Qui celebriores Gallia fluvii?*

Sequana, Ligeris, Garumna, & Rhodanus.

3. *Qua Cali solique affectio?*

Soli temperies salubris; solum oppidum fecun-
dum, praecipue in Provincia versus mare Me-
diterraneum. Vina Campana & Burgundica
passim commendantur,

4. *Qua Gallia divisio?*

Duodecim complectitur Provincias, quarum
tres, Insula nempe Franciae, Provincia Aureli-
anensis, & Lugdunensis medietullium ferme ob-
tinent. Tres ad Septemtrionem recedunt, Bri-
tannia nimirum, Normania & Picardia. Tres
Orientem spectant, nempe Delphinatus, Bur-
gundia & Campania. Tres, tandem. Provincia
videlicet, Occitania & Aquitania Austrum ver-
sus, mari Mediterraneo & Hispaniae adjacent.

5. *Qua Galliae Metropolis?*

Lutetia sive Parisii ad Sequanam.

6. *Quis Gallorum genius?*

Sunt festivi, comes, affabiles, ad res gerendas
non minus, quam excogitandas prompti & ex-
pediti, variis in artibus, ac Scientiis probe ex-
exercitati; sui tamen, rerumque suarum immo-
dici aestimatores, leves, instabiles, novarum sem-
per rerum atque elegantiarum, in vestitu pra-
sertim

terrim, architecti, quibus aliarum nationum
oculos fascinant, & loculos emungunt.

7. *Quæ ibidem Regiminis forma?*

Monarchica.

8. *Quæ Religio?*

Catholica, nisi quod hæresis Janseniana, Vati-
canis licet fulminibus toties percussa, totoque
orbe reliquo exulare iussa, in Gallia asylū magno
identide molimine quæritet, inventura heu
dubie, nisi Regis Christianissimi, totque virorum
purpurâ, infulis, togâ sagoque, virtute item &
doctrinâ omnigena conspicuorum zelus & in-
victa constantia totis viribus obniteretur.

9. *Quæ Gallia antiquæ divisio?*

Generatim dividebatur in Galliam Cisalpinam
& Transalpinam. Cisalpina complectebatur
maximam Italiæ Borealis partem, ubi Insub-
res agrum Mediolanensem, Ligures Genuen-
sem, Taurini Pedemontium &c. incoluere, Gal-
lia Transalpina in Comatam & Braccatam, Co-
mata rursus in Belgicam, Celticam & Aquita-
nicam dispertiebatur. Gallia Belgica hodie partem
est Belgii & Germaniæ. In hac Ubii circa Colo-
niam, Vangiones circa Wormatiam, Tribocci
circa Argentinam &c. consedere. Gallia Cel-
tica agrum Lugdunensem, & Parisiensem, Bri-
tanniam, Normaniam &c. Aquitania vero Va-
sconiam, Occitaniam, Agrum Aurelianensem
&c. complectebatur. Gallia Braccata sive Nar-
bonensis

bonensis Provinciam propriè dictâ, & Delphinatum &c. complexa, appellabatur Provincia Romanorum, quia hi inde initium fecêre Gallicæ sub Imperium suum redigendæ.

§. IX.

Hispania & Lusitania.

HISPANIA.

1. *Qui Hispania limites?*

A Septentrione Oceanum respicit Cantabricû; ab ortu æstivo montes Pyrenæos; à meridie & ortu hyberno mare Mediterraneum; ab occasu Lusitaniam & Oceanum Atlanticum.

2. *Qui præcipui Hispania fluvii?*

Iberus & Bætis, sive *Guadalquivir*. Tagus item Durius & Anas, sive *Quadiana*, qui tres etiam Lusitaniam rigant.

3. *Qua Cæli solique natura?*

Ær, in partibus præcipuè Australibus præferendus interdium, noctu frigidiusculus, ac penetrantis cujusdam, stomachoque adversantis acrimoniæ. Unde hic, perinde atque in Italiæ locis quibusdam, periculosum perhibent, a pertis fenestris noctu somnum capere. Solum admodum fertile est, longè fertilius futurum, si diligentius excoleretur.

4. *Qua Hispania divisio?*

Ex pluribus constat regnis ac Provinciis. In ipso ferè meditullio regna sunt Castellæ veteris

ris, ac novæ, cum regno Legionis: Gallæcia, Asturia & Biscaia, sive Cantabria versùs oram Oceani Sepremtrionalem ab occasu in ortum procurrunt. Montibus Pyrenæis adiacent Navarra, Aragonia, & Catalonia: mari verò Mediterraneo regna Valentix, Murciæ, Granatæ & Andalusix.

5. *Quæ Hispania Metropolis?*

Madritum in Castella nova, ubi sedes regia.

6. *Qui genti huic mores?*

Hispani profundo reconditoque sunt ingenio, severiorum magis disciplinarum, quàm artium liberalium cultores, circumspecti, autoritatis, gravitatis, secretique apprime tenaces; quodque in deliberationibus & consultationibus tardiores, eò in rebus semel decretis sunt constanteriores. Ac licet à labore rusticano, & opificiis ut plurimum adhorreant, virtutis tamen bellicæ, præsertim Caroli V. & Philippi II. temporibus eximia prorsus dedere specimina, laborum quorumvis patientissimi.

7. *Quæ regiminis forma?*

Monarchica.

8. *Quæ Religio?*

Non nisi Catholica, quam cum Rex re & nomine *Catholicus*, tum rerum hæreticarum quotifidotes ita fartam adhuc tectamque conservant, ut nulli hæreticorum sedem illic stabilire capere in hanc usque diem licuerit.

9. *Quæ*

9. *Quæ antiquæ Hispaniæ divisio & appellatio?*
 Hæc Hesperia quoque ultima (quo nomine ab Italia *Hesperia* simpliciter vocari solita, discernebatur) Iberia item & Celtiberia appellata, atque in Hispaniam citeriorem & ulteriorem divisa est. *Citerior*, sive Tarraconensis, dimidia erat Hispaniæ pars, Romæ fuerat vicinior; *ulterior*, verò Lusitaniam & Bæticam, ubi hodie Andalusie & Granatæ regna, complectebatur. Trans fretum Herculeum Mauritania erat Tingitana, Hispanicæ tunc ditionis. In Celtiberia eminebat urbs Numantia, post diutinam obfidionem à Scipione tandem deleta.

LUSITANIA

sive

PORTUGALLIA:

1. *Qui Regni hujus termini?*

A Septentrione & Oriente Hispaniæ contermina est: ab occasu & Meridie Oceano Atlantico alluitur.

2. *Qui fluvii?*

Præcipuus est Tagus, ad cujus ostium urbs est Ulyssipo, Lusitanie metropolis sedesque regia.

3. *Quæ terræ indoles?*

Solis calorem venti, à mari identidem spirantes, mitigant; hinc Cæli temperie ac fertilitate Lusitania Hispaniam superat, vino, oleo, arborum fructibus, pascuis, sale &c. dives.

F

4. *Quæ*

4. *Quæ Regni divisio?*

Complectitur Lusitaniam sive Portugaliam propriè dictam, & Algarbiam.

5. *Qui Lusitanorum mores?*

Sunt frugales & ad rem suam attentis; liberales nihilominus erga egenos, Deoque dicatos homines; in templis exornandis piè prodigi, religione in DEUM & Elque Matrem nulli secundi; scientiis item, mercimoniis & artibus clari.

6. *Quæ ibidem religio floret?*

Sola Catholica, perinde atque in Hispania.

7. *Quo nomine prisca Romani regionem hanc appellabant?*

Pars hæc erat Hispaniæ *ulterioris*, Provincia Lusitanica nuncupata.

HUNGARIÆ REGNUM.

1. *Quis Hungariæ situs atque divisio?*

Ad Septemtrionem montibus Carpatis à Polonia, Silesia & Moravia sejungitur: ad ortum Transylvaniæ & Valachiæ; ad Austrum Sclavoniæ & Serviæ; ad Occasum Austriæ & Styriæ contermina est; dividiturque in Superiorem & Transdanubianam Septemtrionem versùs, & in inferiorem seu Cisdanubianam meridiem versùs. Buda Regni totius caput, regiaque olim sedes erat. Superioris Hungariæ metropolis est Posonium. Regnum porò istud, quod fortissi-

fortissimū Christianæ Republicæ contra Turcas propugnaculū semper fuerat, Domus Austriaca jure hæreditario possidet.

2. *Quod soli, incolarumque ingenium?*

Terra, licet rerum omnium copiâ ad delicias usque abundet; longè tamen uberiores ferret fruges, si diligentius excoleretur. Præ cæteris commendantur boves, vinum & aurum Hungaricum. Incolæ magnis sunt animis, audaces, intrepidi, ad bella gerenda prompti, libertatis amantes &c.

3. *Quæ Religio?*

Jam inde à S. Stephani Regis pariter & Apostoli Hungariæ temporibus Religio Catholica semper floruit, donec Lutheri & Calvinii &c. sectatores noxia errorum suorum zizania hic quoque spargerent, dum inter Ferdinandū I. & Joannem Zapolya Reges pro regno decertaretur, sed posteaquam Regnum hoc universum jugo Turcico jam penitus est exemptum, spes pariter affulget, fore ut Religio avita in antiquissimam suam possessionem postliminio restituarat. Plura habes Opusculo Quarto.

C A P U T IX.

Octo minores Europæ partes.

§. I.

De quatuor minoribus partibus, seu Regionibus,

nibus, Galliam inter & Imperium Germanicum interjectis, Belgio nempe, Lotharingia, Helvetia & Sabaudia.

BELGIUM.

1. *Quis Regionis hujus Status?*

Hæc & urbiū magnificentiâ, & frequentia pagorum, & negotiandi opportunitate, pluribusque aliis prærogativis, totius Europæ regio florentissima meritò censebatur, eo præsertim tempore, quo uni parebat Domino universa. At post plurium Provinciarum ab Religione orthodoxa Regeque Catholico defectione accedentibus insuper Gallorum irruptionibus & continuis propè belli calamitatibus de pristino illo splendore haud parum deperdidit visa est.

2. *Quæ Belgii hodierni partitio?*

Dividitur in Belgium Austriacum, Gallicum & Fœderatum, sive in Belgium Catholicum & catholicum.

3. *Quæ Belgii Catholici Provinciae?*

Ex his Domus Austriaca possidet partem pretiosissimam quatuor Ducatum Brabantiae, Limburgi, Geldriae Superioris & Luxemburgi, & Flandriae Comitatus: partem item Comitatus Hannoniae: Comitatum Namurcensem, Marchionatum Antverpiensem & Dominium Mechlinien-

chliniense. Gallicæ verò ditionis sunt Artesiæ Comitatus cum parte Brabantia, Flandria, Hannonia, & Luxemburgi.

4. *Quæ federati seu A catholici Belgii Provinciae?*
Hæ septem, quæ vulgò *Hollandia* appellari solent, nempe duo Comitatus, Hollandia & Zeelandia: quatuor Dominia, Frisiense, Groningense, Transilalanū & Ultrajectense, cum Geldria inferiore, quo Zutphania quoque Comitatus pertinet.

5. *Qui Belgarum mores?*

Gallo-Belgæ Gallis uti lingvâ habituque, ita & moribus propiùs accedunt. Flandro Belgæ verò, à Flandria, nobilissima Belgii Provincia appellati. Germanis magis sunt moribus, utpote sinceri, candidi, perhumani, gnavi, industrii, frugales, labori à teneris assveti, ingeniosi, & ad omnes scientias & artes idonei non minùs quàm expediti. Præcipuam tamen operam dant faciendæ mercaturæ, cùm ob maris viciniam, tum ob majorum fluminum alveorumque factitiorum frequentiam.

6. *Quæ Belgii urbes præcipuæ?*

In Brabantia Bruxella, Lovanium, Antverpia, Mechlinia &c. in Flandria Gandavum, Bruga, Ostenda, Ipra, Novoportus, Tornacum, Menena &c. In Hannonia Montes, Athum &c. Limburgum item, Luxemburgum, Chiniacū, Namurcum, Carolo-regium, Ruremunda &c.

quæ pluresque aliæ urbes omnino insignes
Austriacæ Domui sunt subjectæ. Galli porro
Atrebatum, Cameracum, Duacum, Graveli-
dam, Insulas &c. Batavi verò Amsterdamũ,
Rotterdamum &c. occupârunt.

LOTHARINGIA.

1. *Quæ, qualisque hæc Regio?*

Regni Austrasiæ pars olim erat. Hodie in go-
minos Ducatus, Lotharingiæ nempe pressius
sumpta, & Ducatum Barensem dividitur, est-
que magnorum Heroïum patria. Et quamvis
montosa sit ac saltuosa, frumento tamen, vino,
& pecoribus &c. abundat. Urbs Princeps est
Nanceium, Ducis Sedes. Incolæ Gallicè ut
plurimum loquuntur. Ad Lotharingiam quo-
que pertinebant tres, nobilissimi Episcopatus,
Metensis, Tullensis, & Virodunensis, quos Gal-
liæ Rex Henricus II. año 1552. ab Imperio Ger-
manico avulsit, Jurisdictione tamen Ecclesia-
stica penes ArchiEpiscopum & Electorẽ Tre-
virensẽ in hanc usque diem remanente. Hic
Ducatus Lotharingiæ & Bari sæculo 18. cessit
Imperio Gallorum, atq; Stanislaõ Leszczyński
Regi Poloniarum cepit parere.

HELVETIA.

1. *Quæ regionis hujus natura est constitutio?*
Tota ferè montibus veluti nativis propugna-
culis

culis obvallatur, ac in tredecim territoria, seu *Cantones* distinguitur, è quibus Lucerna, Uriæ, Suintia, Subsylvania sive Underwaldia, Tugium, Friburgum. Solodorum cum parte Glaronæ, & Abbatiscellæ, cum Valesia item universa, pluribusque aliis urbibus ac locis fœderatis in auita semper religione persistère immobiles: Tigurum verò, Berna, Basilea, & Schaphusia cum parte Glaronensium & Abbatiscellianorū &c. Zwinglium, infamem illum fidei orthodoxæ desertorem ac Transfugam secutæ, priscâ progenitorum suorum religione abjuratâ, novitiæ sectæ adhæsere.

2. *Quæ terra & incolarum indoles?*

Terra lætis undique pascuis viret: unde incolæ ex pecuaria permagnū capiunt quæstū. Quantum porrò Helvetiorum orthodoxorum in fide Catholica, Christi que Vicario defendendo jam olim fervor fuerit & constantia, inde patet, quòd Julius II. anno 1512. Helvetios *Pontificia dignitatis Propugnatores & defensores*; ac Leo X. anno 1515. *Ecclesiæ Defensores* appellare nō dubitaverit. Helvetiorū quoque fidelitas, sinceritas, temperantia, industriosa sedulitas, ac virtus præsertim bellica passim celebratur ab Historicis. Regimen alicubi Aristocraticū, alibi Democraticum est.



S A B A U D I A.

Quid de hac generatim dicendum?

Sabaudix Ducatui ab Austro Pedemontium à Septentrione lacus Lemanus, ab Occasu Gallia, ab Ortu Valleſia eſt contermina. Aura ob crebros montes, perpetua rigentes glacie, frigidior eſt; regio tamen populosa, nec infecunda. Incolæ admodum induſtrii ſunt & laboroſi. Monticolæ relicto paſſim ſolo patrio, Æginæis mercibus diſtrahendis regionatim lucellum quærunť.

§. II.

Quatuor reliquæ Europæ partes, Poloniam inter & Turciam Europæam nempe, Tranſylvania, Valachia, Moldavia, & Tartaria minor.

TRANSYLVANIA.

Quid de Principatu hoc ſtrictim commemoranda.

Hungariæ jam olim adjuncta erat, dein propriis paruit Principibus. Nunc annis amplius triginta Domui ſubeſt Auſtriacæ. Terras, ut montibus, ſylvisque impedita, frugum tamen feraciſſima eſt, cùmque vicina Valachia & Moldavia olim *Dacia* vocabatur. Incolæ in tres potiſſimum claſſes diſtribuuntur, in Ungaros nempe, Siculos five *Siculicales*, & Germanos origine Saxones, quos inter plures alie nationes,

nationes, sectæque diversæ degunt.

VALACHIA & MOLDAVIA.

Quid de geminis hisce Principatibus cursim dicendum ?

Utraque hæc regio suos habet Principes (Hospodaros vocant) Sultano vestigales. Terra, montosa licet ac sylvestris, frumento tamen, vino, equis generosis, armentis & pecore abundat. Incolarum plerique Græcorum schismaticorum erroribus impliciti, aut pecuariam faciunt, aut agriculturæ dant operam, cætera bellicosi,, rerum novandarum, cupidi, dubiæ sublectæque fidei.

TARTARIA MINOR.

1. Quæ hæc Regio ?

Olim Chersonesus Taurica, hodie Tartaria Crimæa & Præcopensis dicitur, quæ Scythæ primùm, dein Tartari, ex Asia profecti, tenuère. Principem seu *Chanum* suū, qui ex *Kirai* semper familia est, ipsi quidem eligunt; sed rata omnino habenda à Sultano electio. Ea porro lege Turcis sunt subjecti, ut Sultanum vel *Vezirium*, ad bella proficiscentem, cum delecta militū manu comitari cogantur, nō alio numerato stipendio, nisi quod ex præda sibi vindicāt.

2. Quis Tartarorum genius ?

Domos plerique non incolunt, sed parva construunt tuguria, in acumen fastigiata, quæ
carris

carris imposita cum uxoribus, liberis & peco-
ribus secum, quo lubet, circumferunt, & obvi-
is quibusq; absumptis, aliud commigrant, gens
hominum barbara, bellicosa & raptu vivere
assueta.

CAPUT X.

Mapa Geographica Asia,

1. *Quis Asia situs?*

Nobis Europæis ad Orientem, partemque po-
tissimam sub zona temperata Boreali sita est,
atque à Septentrione Oriente & Meridie va-
stissimo cingitur Oceano; Occalum versùs ma-
ri rubro ab Africa, mari verò Mediterraneo &
Ponto Euxino &c. ab Europa secernitur.

2. *Qua Cali affectio?*

Aura ad Septentrionem perfrigida, in medio
temperata, Austrum versùs præseruida est.

3. *Qua terra indoles?*

Septentrionem versùs, ubi Tartaria magna fi-
ta, terra vasta & horrida, magnamque partem
nobis incognita est. Regiones verò mediter-
raneæ uti Persia, India, China, &c. serico, a-
romatis, fructibus, gemmis, margaritis, auro
argentoque abundant.

4. *Qui Asiaticorum genius?*

Varius pro vario regionum situ. Nam zonæ
torridæ accolæ Africanis similiores sunt, hoc
est, inconstantes, vehementes, vasti & astuti
&c.

&c. languidiores contra ac hebetiores, qui ad Boream recedunt. Quibus verò mitius clima obtigit, hi mitiore pariter sunt indole; molles tamen ut plurimum, delicati & voluptatibus dediti, præsertim postquam orthodoxa religio, optima, ut aliàs monuimus, morum magistra, inde exulare cœpit.

5. *Quæ igitur ibidem religio?*

Superstitio Mahometana instar luis epidemicæ totam fermè Asiam infecit. Sunt tamen ibi & Ethnici & Judæi, & Christiani non pauci qui postremi in varias iterum sectas abiêre.

6. *Quæ Asia præ reliquis mundi partibus prærogativa?*

1. Hic prima generis humani incunabula, nostrorumque progenitorum & Patriarcharū patria, ex qua deductæ in omnem terrarum orbem colonix. 2. Hic tres illæ Monarchiæ longè potentissimæ, Assiriorum, Persarum & Græcorum florûere. 3. Hic artes pleraque omnes scientiæque inventæ. 4. Hic Theatrum erat, ubi ludens in orbe terrarum DEI Sapientia tot tamque admiranda mundo dedit spectacula. 5. Hic terra illa divinitus promissa, lacte & melle fluens, ubi ipse DEI Filius natus & educatus, annosq; ampliùs triginta cum hominibus versatus est. 6. Inde orta DELpara, cœli terræque Regina, Prophetæ Sanctissimi, CHRISTI Apostoli, primi illi legis Evangelicæ ac Fidei orthodoxæ.

thodoxæ præcones & Doctores. 7. Hic Eccle-
siæ novalis Christi que vinea, divinis manibus
plantata. DEI Hominis sudore ac sanguine
Martyrumque cruore irrigata, latissimè flori-
t, primitiasque tulit cœlo acceptissimas, pro-
pagines inde suas ac germina emissura per or-
bem universum &c.

7. *Qua Asia divisio?*

Olim in Asiam majorem, & minorem, hodie
rectius diviseris in Imperium Turcicum, Persi-
cum, Mogolicum, Tartaricum & Sinicum, at-
que Insulas Asiaticas.

8. *Qui potentissimi Asia Monarchæ?*

Turcarum Imperator, Rex Persarum, Magnus
Mogol, & Imperator Sinensis, cui magna quo-
que Tartariæ majoris pars subjecta est.

§. I.

Turcia Asiatica.

Quasnam complectitur Provincias?

Sex: Anatoliam, Syriam, Arabiam, Georgiam,
Armeniam, & Diarbecchiam. Tres priores cis,
posteriores trans Euphratem sitæ sunt.

I. ANATOLIA.

1. *Quod regioni huic nomen? Quis situs?*

Hæc, quod Europæis ad Orientem posita sit, à
Græcis Anatolia ab *Oriens* ab Italis *Lenante*, ab
antiquis Romanis Asia minor dicta, Peninsulæ
instar, à Septentrione Ponto Euxino, Euphra-
te ab

te ab Oriente, à Meridie mari Mediterraneo, si-
ve Lycio & Pamphilio, ab Occidente Archipe-
lago, Helleponto, Propontide & Bosphoro
Thracio terminatur.

2. *Quæ terra indoles?*

Regio hæc & Cæli clementiâ & soli ubertate,
& urbium frequentia, & victoriis, quas tum
Græci à Persis, tum Romani à Mithridate a-
liisque reportârunt, longè clarissima, hodie à
Barbaris neglecta, peneque deserta jacet.

3. *Quæ divisio?*

Turcæ hodie dividunt in 4. Provincias, nempe
1. in *Anatoliam* propriè dictam, quæ occiden-
tem & mare Ægæum versùs, olim Bithyniam,
Paphlagoniam, Mysiam, Phrygiam, Lydiam,
Æoliam, Joniam, Cariam, partemque Galatiæ
complectebatur. 2. In *Amasiam*, Septemtrio-
nem Pontumq; Euxinum versùs, ubi olim re-
gnû Ponti & Capadociæ cum parte Galatiæ.
3. In *Caramaniam*, versùs Austrû & mare Me-
diterraneû, ubi aliàs Lycia, Pamphylia, & Ci-
licia &c. 4. In *Aladuliam*, versùs Orientem
& flumen Euphratem, quæ Armeniam mino-
rem antiquam continet. Huc quoque perti-
nent Insulæ Cyprus, Rhodus &c.

4. *Quæ celebriores hic olim urbes numerabantur?*

In Bithynia Nicæa, Chalcedon &c. in Jonia
Ephesus, Smyrna &c. in Cilicia Tarsus: in Ly-
dia Thyatira: in Phrygia minore Troja urbs
longè

longè decantatissima: ad Hellepontũ sive fretum Callipolitanum Abydos, eque regione Sestos, arces munitissimæ, quas vulgò *Dardanellas majores* vocant; nam Dardanellæ minores in Græcia ad fauces sinus Corinthiaci-
trumque litus communiunt.

II. SYRIA.

1. *Quid de hac memorandum?*

Syriam sive Soriã Turcæ dividunt in tres Provincias sive Præfecturas, Alepensem, Tripolitanam, & Damascenam, quarum singulæ à Bassa, sive Præfecto Turcico administrantur. Alepensis continet Syriæ antiquæ partem Borealem, cujus caput Alepum, urbs ampla & commerciis florentissima. Tripolitana partem Phœniciz & Cælesyriæ complectitur. Ubs princeps est Tripolis ad mare Mediterraneum, ubi portus percommodus. Damascenæ Præfecturæ caput est Damascus celebre emporiũ ad Libani montis radices. Ad Præfecturam hanc pertinet Palæstina, cujus, uti & Syriæ solum longè fertilissimum meliorẽ passim culturam desiderat, idque vel ob Turcarum aversionem, vel incolarum desiderium.

2. *Ubinam Pentapolis, ac mare mortuum?*

Pentapolis regio olim amœnissima Palæstinam inter & Arabiam, à quinque urbibus, Sodoma, Gomorrha, Adama, Seboim, & Segor appellata,

lata, deflagrationis illius horrendæ reliquias longè tristissimas hodieque ostentat; universus quippe terræ illius tractus aspectu horrendus summè sterilis poma profert in speciem pulcherrima, sed quæ manibus contrectata, in cineres abeunt. Ibidem lacus est, continuum fumum & sulphur, quasi reliquias funesti illius incendii exhalans, à bitumine, Asphaltites dictus, tetri omnino ac pestilentis odoris; unde nec pisces ibi, nec svtæ aquis volucres. Vocatur & *Mare Mortuum*, cùm quòd odor ejo gravissimus omnibus vitæ prædit is, adversetur, tum quòd ob lentum ac spissum bitumen nec aurâ, nec ventis moveri unquam possit.

3. *Quid porrò de Palestina seu terra sancta memorandum restat?*

Hæc à Chananzæis primùm, hisque DEI monitu exterminatis, à populo Israëlítico incolebatur. Terminus ejus à Septentrione mons Libanus, ab Occasu mare Syriacum (quod & Sidonium & Phœnicium dicitur) à Meridie Arabia perxa, ab ortu Arabia deserta. Quadrifariam dividebatur 1. in Judæam, 2. in Samariam, 3. in Galilæam. 4. in Perxam. In Judæa tribus Juda, Benjamin, Simeon & Dan; in Galilæa Aser, Nephthali, Zabulon & Issachar; in Samaria Ephraim cum dimidia tribu Manasse; in Perxam trans Jordanem, ubi & Iturea & Trachonitidis regio, Ruben & Gad cum reliqua

qua Manassis tribu confedère. Terræ Sanctæ metropolis, regni que olim Judaici sedes erat Hierosolyma, toto terrarum orbe nominatissima, hodie solo ferè nomine & CHRISTI Sepulchro pulchro celebris.

III. A R A B I A.

1. *Quid de regione hac paucis dicendum?*

Arabia triplex est, Petræa, deserta & felix, ubi varii Principes (Emiros vocant) dominantur, quorum plerique Turcis, cæteri Persis sunt vel Scythicæ. Per Arabiam Petræam, majori ex parte sterilem, arenosam ac sole torridam, populus Israëliticus, Moysæ ductore, ex Ægypto in Palæstinam longo viarum circuitu est profectus. Mons ibi Sinai & Horeb, uterque Deus cum Moysæ alloquio insignis. Arabia deserta Judæis Cedar, maximam sui partem plana est, at sterilis pariter & arenosa, ideoque deserta. Arabia felix, ubi regnum Sabæ fuisse traditur, auro, gemmis, balsamo, thure, myrrha, aromatis & fabis, vulgo Caffè abundat. Inter urbes præcipuas est Mecha, Machometis patria, & Medina, ubi Pseudoprophetæ tumulus. Urbes utraque summa Machometanorū, catervatim illuc confluentium superstitione frequentatur.

2. *Quis Arabum genius, quæve celi affectio?*

Calor ibi maximus; quem tamen roras matutini nonnihil mitigant: hinc itinera nocte peraguntur.

peraguntur. Incolæ cum armentorum gregibus pascua vagi pererrant, & Scytharum more habitant sub tentoriis, quoad pabulum suppetit; quo absumpto aliò commigrant, latrociniiisque finitimos infestant. Quæ urbes incolunt, paulò humaniores sunt, mercaturæ ut plurimum dediti, Machometis tamen erroribus omnes impliciti.

IV. GEORGIA.

Ubinam sita hæc regio?

Pontum Euxinum, & Mare Caspiû interjacet; inque plures distribuitur Provincias, quas inter Georgia propriè dicta sive Gurgistan, ubi olim Iberia: Colchis item Argonautarû expeditione celebris, quæ Mengrelia hodie vocatur, atq; in tres iterum dividitur Principatus. Terra frugifera alioquin, parùm excolitur, ac partim Turcis, partim Persis vectigalis est. Religio Christiana quidem, sed erroribus plurimis inquinata.

V. ARMENIA sive TURCOMANIA.

Quenam hæc Regio?

Potissimam Armeniæ majoris partem completur. Hic eminent mons Ararat, in cujus præalto vertice Arca Nôë; cessante terrarum eluvione confedissee perhibetur. Multi quoque in Armenia hac supersunt Catholici; quos tamen hæretici, Eutyehiani potissimum & Monothe-

licæ, Machometani item & Hebræi junctis viribus omnino exterminare nituntur.

VI. DIARBECHIA.

Quæ hodie Regionis hujus facies?

Veteris Assyriæ partem, Mesopotamiam, Babiloniam & Chaldæam complectitur, regio olim amœnissima & deliciis plena; hodie tamen cùm ob colonorum socordiam, tum ob continuas Arabû grassationes horrida & inculta, uti Regionem pleræque omnes Turcico imperio subiecta. In tractu porro illo, ubi Euphrates & Tigris confluunt, Paradisus fuisse traditur; cujus tamẽ, uti & veteris Babylonis, Ninives, Edesæ, Ur, Haran, turris Babel &c. vix rudera extat.

§. II.

Reliquæ Asiæ partes.

PERSIA.

1. *Qui Regni hujus termini?*

Ad ortum Indus, ad occasum Tigris amnis, ad Boream mare Caspium & fluvius Oxus, ad Austrum Oceanus Indicus & sinus Persicus.

2. *Quæ divisio?*

Quinque olim partes præcipuas complectebatur, nempe 1. Ariam ad Ortum sive Indiam versûs. 2. Sogdianam maximè ad Septentrionem versûs Scythiam. 3. Prathiam itidem ad Septentrione juxta mare Caspium. 4. Mediã ad Occasum versûs Armeniam & Assyriam.

5. Per-

5. Persidem ad Austrum versùs sinum Persicū, ad cujus fauces Armuzia urbs quondam munitissima cum portu insigni, Lusitanici tunc Juris sita erat; quæ tamen, uti & plura alia anno 1622. Anglorū; Machometanis magis, quàm Catholicis faventium, consilio & operâ, Lusitanis fuit erepta, & Christiani nominis est hostibus tradita. Summatim Provinciæ erant septemdecim, quibus omnibus nova pridem nomina fuere imposita. Urbes præcipuæ fuere Persepolis, ab Alexandro Magno sortì hortatu in cineres redacta, Ecbatana Persiæ Regum sedes æstiva, & Susa sedes hyberna. Hodierni regni Persici metropolis sedesque regia est Aspahanum.

3. *Quod soli & incolarum ingenium?*

Fluvii in Regno hoc amplissimo perpauci, hîq; in plures deducti rivos, ad agros nimio solis æstu torridos & exsuccos humectandos. Provinciæ Boreales temperatiores sunt ac fertiliores; Australes contra præfervidæ; quædam etiam deserta, arenosæ, ac steriles. Incolæ mercaturæ potissimum se dedunt, longèque erga externos humaniores sunt, quàm Turcæ. Ab his tamen ob diversam Alcorani, in cujus verba utrique jurant, expositionē plurimum discrepant, acerbisque idcirco odiis se mutuo prosequuntur.

I N D I A.

1. *Quæ India divisio?*

G2

India

India à flumine Indo nomen trahens, quadri-
 fariam dividi potest. 1. In Indiam Indum inter
 & Gangem Septemtrionem versùs, ubi magni
 Mogolis Imperiũ, de quo in Opusculo IV. me-
 minimus. 2. In Peninsulã intra Gangẽ Ortũ
 versùs. 3. In Indiam Insulanam.

2. *Quid de Peninsula intra Gangẽ memorandũ?*
 Peninsula hæc plurima complectitur regna, in
 quibus Lusitani ante annos ampliùs ducentos
 urbes locaque alia non pauca Ecclesiæ CHRI-
 STI, Regisque Lusitanici imperio subdidere.
 At posteaquã Batavi longo post tempore Lusi-
 tanos pluribus in locis antiqua sua possessione
 exturbãrunt, non Lusitanicæ solũ, sed Chri-
 stianæ quoque res in Oriente plurimũ accis-
 fuerunt: Goa tamen, ArchiEpiscopi & Prore-
 gis sedes, sex munitissimis castellis portuque in-
 signi instructa, in Lusitanorum adhuc potesta-
 te est, ubi & S. Francisci Xaverii Indiarum A-
 postoli Sanctitate & miraculis toto terrarum
 orbe celebratissimi corpus ab an- 1552. in hanc
 usque diem incorruptum visitur, trecentis lam-
 padibus ad ejus tumulum jugiter ardentibus.

3. *Quæ regna nominatiora Peninsula intra
 Gangem complectitur?*

1. Ad Septemtrionem Regnum Avæ & Pegu-
 anum. 2. Ad Austrum Siamum & Malacam,
 olim *Auream Chersonesum* dictam. 3. Ad Or-
 tum Tunchinum & Cochinchinam cum pluri-
 bus aliis regnis,

4. *Quid*

4. *Quæ insula celebriores in Oceano Indico?*

1. Maldivæ infra oram Malabaricâ longo tractu ab Aquilone in Austrum porrectæ, & in tredecim series distinctæ. 2. Ceylanus è regione oræ Piscariæ & Coromandiæ Lusitanici primùm juris, dein à Batavis occupata. 3. Sumatra, Borneu ex Asiæ insulis maxima, & Java infra Peninsulam extra Gangem. 4. Molucæ in magnas & parvas divisæ. 5. Philippinæ Sinâ inter & Molucas, & Mariæ Annæ inter Oceanum Orientalem & mare Pacificum, quarum illæ à Philippo. II. Rege, istæ à Maria Anna Regina Hispaniæ nomen duxêre. His adjungimus insulas Japonicas, quæ ultra Sinam Orientem versus porrectæ uni subsunt Monarchæ.

5. *Quæ India fertilitas?*

Saccharo, oriza, gossipio, serico, aromatis omnium generis; margaritis item, gemisque pretiosissimis, auro & argento &c. abundat. Sed vix usquam gentium plantâ, arboremve æquè utilem reperias atque illam, quæ nuces (*cocos* vocant) humani propè capitis magnitudine passim profert; namque & cibum, & potû, & vestitum & quidquid fermè ad supellestilè vel nauticam, vel domesticam necessarium est, sola suppeditat.

6. *Quid verò de religione dicendum restat?*

Jam inde à magni Indiarum Apostoli Xaverii adventu homines illic innumeri ab Ethnica

& Machometana superstitione ad veri Numinais cultum fuere adducti. At postquam hæretici Europæi in has quoque terras, quo Catholici dudum ante immensis sanè sumptibus, laboribus, periculisque aditum sibi aperuere, pedem intulerunt, vera inde religio, fides, pietas &c. passim abire in exilium compulsæ est irreparabili tot millium animarum exitio. In Japonia certè res Christiana tantopere floruit, ut primitivam illam Ecclesiam in extremum hunc orbis angulum commigrasse crederes. Verùm Hollandi falsis suis criminationibus, calumniis, obrectationibus Japonum Monarcham tandem impulsere, ut multis Christianorum millibus immanissimè trucidatis, & Christum, & ipsum adeo nomen *Christiani* Japonia universa proscriberet. Solis Hollandis, utpote qui nã *Christianos*, sed *Hollandos* se esse palàm diserte, que profitentur, aditus in regnum hoc, quò per calcatum pergunt CHRISTUM, est concessus.

TARTARIA MAGNA.

Quid de hac memorandum?

Amplissima hæc Asiae pars ad Occasum Moscoviã & mari Caspio, ad Austrum Persiã, Indiã & Sinã; ad Ortum & Septentrionem, mari Tartarico terminatur, dividiturque in partes plures, vix nomine Europæis notas. Hic vetus illa Scythia cæterior, sive intra Imaum, & ulterior sive extra Imaum montem, Serica item, populique

Serco.

Seres fuisse perhibentur. Tartari moribus sunt
 efferis, incultis & barbaris. Carnes equorum
 & camelorum semicrudas cum lacte equino in-
 ter gulæ lauitias numerant.

S I N A.

Quinam Imperii hujus termini?

Ab Oriente & meridie Oceanus Orientalis, qui
 & Sinensis à Sinis dictus; ab Occasu India; à Se-
 ptemtrione Tartaria magna, à qua muro illo, ad
 quingentas fermè leucas porrecto, sejungitur;
 Regio hæc tum rebus cæteris, tum præcipue se-
 rico tantopere abundat, ut hoc plerique omnes
 vestiri solcant. Herba *Thea*, & vasa fictilia, quæ
porcelana vocant, ex Sinis allata, præ cæteris
 commendantur. Potentissimi vastissimique hu-
 jus Imperii metropolis ac sedes regia Pechinū
 est, qua ampliorem frequentioremq; urbem
 Orbis non habet.

C A P U T X I.

Mappa Geographica Africæ.

I. Quis Africa situs?

Maxima hæc orbis terrarum Peninsula exiguo
 isthmo Asiæ conjungitur, atque ad Septemtrio-
 nem mari mediterraneo, ad Ortum Erythræo &
 Indico, ad Occidentem & Austrum Oceano A-
 tlantico & Æthiopico cingitur. Figura ejus in
 mappa Geographica accedit ad cordis similitu-
 dinē, cujus pars Superior zonæ temperatæ Bo-
 reali,

reali, mediterraneæ zonæ torridæ, pars inferior
zonæ temperatæ Australi subjacet.

2. *Quæ præcipua Africa flumina?*

1. Nilus, qui à Meridie in Septentrionem per
Abyssiniam, Nubiam & Ægyptum procurrens,
mare subit Mediterraneum. 2. Niger, qui ab
Ortu Occalum versùs Nigritiam bifariâ secans,
in mare Atlanticum pluribus ostiis irrupit.

3. *Quæ Africa magnitudo?*

Si terræ spatium metiare, triplo ferè major est
Europâ; at si habitatorum numerum supputes,
duplo fortè minor censei poterit. Nam vastis-
sima illic terrarû spatia aut inculta jacent, aut
arenis sterilibus obducuntur, aut nimio solis æ-
stu torrentur, aut multiplici animalium noxiorsu
generè infestantur. Alicubi tamen, in locis
præfertim maritimis & ubi irrigua sunt flumina,
mira soli fertilitas: ut proinde quidquid Africa
sive boni, sive mali producit, *prodigiosum* dici
possit.

4. *Quæ Afrorum indoles & Religio?*

Quamdiu religio vera, quæ efferas etiam atque
indomitas gentes mansuefacit, atque ad om-
nem humanitatē informat, in Africa floruit,
alia prorsus vitæ morumque disciplina & cul-
tura viguit. At postquam & hæretica impietas
& Machometana superstilitio animos inficere
cepit & corrumpere, mox ad ingenium Afri
pristinamque rediêre barbariè. Hodie Macho-
metani

metani in Barbaria præcipue & Ægypto, in Abassia &c. Christiani, alibi etiam idolorum degunt cultores. Hi porrò, qui Ægyptum, Barbariam, locaque finitima incolunt, albo, seu potius subflavo; reliqui nigro sunt colore.

5. *Quinam in Africa rerum potentior?*

1. Turcarum Imperator. cui Ægyptus paret potissimaque Barbariæ pars vectigalis & obnoxia est. 2. Rex Fessæ & Marochii. 3. Abassia si-ve Abyssiniæ Imperator. 4. Imperator Monomotapæ.

6. *Quæ Africa divisio?*

Nos in Superiorem si-ve Borealem, & inferiorem si-ve Australem dividimus. Alii aliter partiuntur.

§. I.

Superior Africæ Pars.

1. *Quas Regiones hac complectitur?*

Sext: 1. Barbariam, 2. Ægyptum, 3. Biledulgeridiam, 4. Zaaram si-ve desertum, 5. Nigritiam, 6. Guineam.

2. *Ubinam Barbaria sita est?*

Partem potissimam mari Mediterraneo circumiacet è regione Europæ. Regnum Fessanum & Maroccanum, ubi olim Mauritania Tingitana erat, juxta Oceanum Atlanticum, versus fretum Herculeum porrigitur. Inde tres sequuntur Respublicæ, Algeriana, Tunetana, & Tripolitana, famosa piratarum receptacula. In tractu Algeriano olim Numidia, & in hac urbes Hypo-

pon (hodie *Bona*) & Tagaste erant, illa Episcopatu, hæc natalibus S. Augustini clara. Haud procul urbe Tuneto Carthago stetit, urbs quondam nominatissima Romæque æmula; cujus tamen nonnisi rudera quædam existant. Extrema Barbariz pars, Ægyptum versus, est Barcana regio, ubi olim Lybia exterior, Cyrenaica & Marmarica.

3. *Quid de Ægypto memoratu dignum occurrit?*
 Ægyptus dividitur in inferiorem, mediã & Superiorem, quæ hodie *Said*, olim Thebais dicta est, tot Virorum Sanctissimorum nutrix. Ac licet terra pluviis raro aut nunquam irrigetur; annua tamen inundatione Nili, qui sub æstivum solstitium intumescere incipit, mirum quantum sæcundatur. Regionis caput Cairus est, urbs totius Africae amplissima. Inde haud procul absunt Pyramides miræ altitudinis. Alexandria porro, ob Alexandro M. ad oram maris Mediterranei edificata, de pristino illo splendore plurimum deperdidit. Visebatur inde turris Pharos, mundi miraculum.

4. *Quid de Biledurgeridia, Zaara, Nigritia & Guinea memorandum?*

1. Biledulgeridia à dactylis, quibus abundat, nomen trahens, Barbariz contermina est, longissimoque tractu ab Ægypti confinibus ad Occanum Atlanticum protenditur. 2. Zaara, ubi olim Lybia interior, leones, tigrides, struthiones, varique monstra alit, quibus homines indigent haud

haud multū abſimiles. 3. Nigritiā Niger amnis
 peinde ac Nilus Ægyptum inundare dicitur, ac
 fecundare. Incolæ Hiſpanis ac Luſitanis pluri-
 ma vendunt mancipia, quæ deinde in Ameri-
 cā tranſvecta, multis magnisque laboribꝯ exer-
 centur. 4. Gvinea auro, ebore, rebusque aliis
 abundat; quo circa ab Europæis plurimūm fre-
 quantatur, præſertim ab Anglis, Batavis, Da-
 nis & Brandeburgis, qui littoribꝯ illis, *Ora præ-*
ſertim Aurea, ob aureas arenas ſic nuncupatz,
 plures arces munitiſſimas impoſuere.

§. II.

Pars Africa Inferior ſive Æthiopia.

1. *Quas, qualesque regiones hæc continet?*

Idem ſex, nempe Nubiam, Abyſſinam & Zan-
 guebariam, quæ olim Æthiopia Superior ſeu
 interior appellabantur: regna itē Congi & Mo-
 nomotapæ cum Caſtrezia, quæ Æthiopia infe-
 rior ſeu exterior nuncupabantur.

2. *Quid de his omnibus ſummatim dicendum?*

1. Nubia infra Ægyptum ſita, rigatur Nilo &
 Nubiâ amne, alitq; camelos optimos. 2. Abyſ-
 ſina ſive Æthiopia propriè dicta, Abyſſinorū
 Imperatori parez; multæ tamen provinciæ ab
 Imperio hoc, olim ampliffimo, fuere avulſæ.

3. Zanguebaria Regio per ampla, à Caſtrezia per
 longum tractum littoralem verſus mare Ara-
 bicum protenſa Luſitani Moſambicum, plura-
 que alia loca obtinent. 4. Regnū Congi, quod

fluvio

Auvius Zairus cum aliis annibus minoribus zigat fecundatque. 5. Monopotapæ Imperium amplissimum, auri argentique ferax. 6. Cafferia, postrema Africæ pars ab Oriente, Meridie & Occidente Æthiopico undique Oceano cingitur, ubi promontorium bonæ spei maximè ad Austrum procurrens.

§. III.

Africæ Insulæ.

Quæ celebriores Africa Insulæ?

1. Canariæ sive fortunatæ, in Oceano Atlantico Hispaniæ Regi subiectæ, quas inter eminet Tenerifa, ubi Picus omnium, ut ajunt, montium altissimus. 2. Hesperides sive promontorii viridis, quæ & Gorgones sive Gorgades dictæ, itidem in Oceano Atlantico è regione promontorii viridis in Nigritia. Subsunt Regi Lusitanix. 3. Madagascaria sive S. Laurentii in Oceano Æthiopico. Est ex præcipuis totius orbis Insulis. 4. Melita in mari Mediterraneo Siciliam inter & tripolim, fortissimè Italix adversus Turcas & Mauros piratas propugnaculum. Hanc Carolus V. anno 1530. Equitibus Melitensibus cessit.

C A P U T XII.

Mappa Geographica America.

1. *Quanam sub Zona sita est America?*

Sub Torrida, & duabus temperatis.

2. *Quis*

2. *Quis ejusdem situs?*

Ad Aquilonem Oceano Glaciali, ad Ortum Atlantico, ad Occasum Pacifico, ad Austrū fretō & mari Magiellanico cingitur. Nobis Europæ ad Occidentem sita est. unde & India Occidentalis appellatur.

3. *Quinam præcipui Americæ fluvii?*

1. Canada, sive fluvius S. Laurentii. 2. Fluvius Amazonum. 3. Fluvius Argenteus. 4. Fluvius Grandis.

4. *Ecquod terra & incolarum ingenium?*

Terra pro vario situ cœlique positu alicubi rerum omnium feracissima, sterilis alibi & infœ; cunda est. Incolæ, tametsi ad res proprio Marte & arte inveniendas minùs sint prompti & expediti; aliorum tamen opera artificiosissima, examussim, nōrunt imitari. Ante Europæorū in has terras adventum vivebant ferarum ritu: at nunc iis in locis, quæ Catholici *Missionarii* illustrarunt, informâruntque, vitam ducunt admodum honestam.

5. *Quæ ibidem Religio?*

Olim mera hîc erat barbaries, summa rerum omnium ignoratio, & immensū fœditissimarū superstitionum chaos. At postquam Hispaniæ, Galliæ & Lusitaniæ Reges religiosissimi, provincias illas, recens detectas, & Ecclesiæ Christi in primis, & suo subdidere imperio, Religio ubique Catholica floret, majoraque in dies capiet

pit incrementa. Atque hinc agnoscere licet miram DEI, Ecclesiam suam nunquā deserentis, providentiam: quippe jam inde à tempore illo, quo apostatarum omnium coryphæus Lucifer *in lateribus Aquilonis* sive extremo Europeæ angulo per Lutherum aliosque *emissarios* veræ Fidei lumen omnino extinctum ibat, DEUS in Asia, Africa & America ad extremū nempe Orientem, Meridiem & Occidentē per tot *Missionarios*, virosq; Apostolicos multas hominum myriades puri sincerique Evangelii luce collustravit.

6. *Quæ America divisio?*

Dividitur generatim in duas prægrandes Peninsulas, tenui isthmo Panamam inter & Portū Pulchrum connexas. Quæ ad Boream procurrit America Septentrionalis sive Mexicana; quæ verò ad Austrum porrigitur, America Australis sive Peruana appellatur.

§. I.

America Borealis.

1. *Quasnam regiones complectitur?*

1. Canadam sive novam Franciam, quæ Galolorum est. 2. Virginiam, quæ Anglorum. 3. Floridam, Novum Mexicum & Novam Hispaniam sive regnum Mexicanum, quæ Hispanorum sunt, & duabus prioribus fertilitate, divitiis &c. longè præstant.

2. *Quæ*

2. *Quae Insulae Americae Borealis?*

1. Europae maximè vicinæ sunt Azores, quæ & Insulae accipitrum ob horum copiâs, & Flandricæ, quod à Flandris inventæ sunt, appellântur. Subsunt Regi Lusitanicæ, & ab aliis inter Africæ insulas numerantur. 2. Insulae Lucajæ. 3. Antillæ majores & minores. Harum pleræque sunt admodum frugiferae, & partim Hispanis partim Gallis, Anglis & Batavis &c. subiectæ. 4. Californiam, tractu longissimo propè novum Mexicû à Borea in Austrum porrectum, nonnulli Peninsulam esse perhibent.

§. II.

America Australis.

1. *Quae ejusdem regiones præcipuae?*

1. Terra Firma sive Castella Aurea, 2. Paraquaya sive Paraquaria, 3. Terra Magellanica, 4. Chile, & 5. Perua sive regnum Peruanû, Hispanicæ sunt ditioris; 6. Brasilia verò Lusitanicæ.

2. *Quanam has inter regiones principatum tenent?*

Regnum Peruanum rebus omnibus affluens, plurimisque & auri & argenti fodinis, dives in monte præsertim Potosio, ubi venæ argenti inexhaustæ.



C A P U T XIII.

De Regionibus incognitis.

1. *Quæ sunt hujusmodi regiones?*

1. Arcticæ sive Boreales, quæ Polo Arctico. 2. Antarcticæ sive Australes, quæ Polo Antartico circumjacent. Vocantur *incognita*, quia perpauca de iis explorata habemus.

2. *Quæ regiones incognita ad Polum Arcticum?*

1. Spizberga seu *Montes acuti* inter Novam Zemblam ad ortum: & Grænladiam ad occisum. 2. Nova Zembla, Moscoviæ septemtrionali ferè adjacet, à qua freto Vaigatio dirimitur. 3. Jelsonis Regio, ultra Japoniam, Septemtrionem versùs excurrit. 4. Gronia sive Grænlania ultra Europam & Americam Borealem porrigitur. 5. Islandia Insula Norvegiam & Grænladiam interjacet. Hanc veterem illam Thulem nonnulli autumant. Est ibi Hecla mons ignivomus.

3. *Quales hæ regiones?*

Perfrigidæ admodum. Quæ ipsa causa est, quòd minùs adhuc sunt cognitæ; cum ob vehementem frigus & glaciè adiri vix possint. Hollandi quidem aliquot abhinc annis Spizbergam usque & Novam Zemblam penetrarunt; sed commorari diutiùs haud poterant. Ob nives perpetuas ursi ibi alizque bestie albescunt. Balenas ad Spizbergam magno numero mari in-

natan-

natantes Batavi æstate capiunt. Indigenæ as-
peris & incultis sunt moribus, atque idolola-
triæ ut plurimum dediti.

4. *Quæ regiones incognitæ ad Poli Antarcticū?*
1. Nova Guinea infra Asiam ortum versùs sita
est. 2. Carpentaria versùs Polum Antarcticū
longiùs excurrit. 3. Insulæ Salomonis Novam
Guineam & Americam Australem interjacent.
4. Quiri Regio seu Terra Australis Spiritùs
Sancti infra Insulas Salomonis, & 5. infra illam
Nova Zelandia Polum versùs protenditur. 6.
Nova Hollandia, rerum omnium egentissima,
infra Insulas Asiaticas & Novam Guineam oc-
casum versùs sita est. 7. Ignium Regio insula
amplissima est, fretum Magellanicum inter &
Mæreum sive Sancti Vincentii. 8. Diemeni
Regio infra Novam Hollandiam, Polum ver-
sùs porrigitur &c.

F I N I S.



H

I N-



INDEX

Capitum hujus Opusculi

P A R S I.

De Globo.

<i>Caput I.</i> De Globo ejusque partibus generatim.	pagina 3
<i>Caput II.</i> De Æquatore Zodiaco, Ecliptica	6.
<i>Caput III.</i> De Meridiano.	7.
<i>Caput IV.</i> De Horizonte.	9.
<i>Caput V.</i> De Tropicis.	10.
<i>Caput VI.</i> De Circulis Polaribus.	11.
<i>Caput VII.</i> De quatuor mundi Cardinibus sive plagis.	11.
<i>Caput VIII.</i> De longitudine & latitudine locorum.	12.
<i>Caput IX.</i> De Zonis.	14.
<i>Caput X.</i> De diversis anni temporibus in diversis Zonis.	15.
<i>Caput XI.</i> De Climatis.	16.
<i>Caput XII.</i> De diversis effectibus cursus solaris.	17.
<i>Caput XIII.</i> De usu Globi.	20.

P A R S II.

De Mappis seu chartis Geographicis.

<i>Caput I.</i> De Planisphærio terrestri.	22.
<i>Caput II.</i>	



Caput II.	De mappis Geographicis generatim.	23.
Caput III.	De variis mensuris Geographicis.	26.
Caput IV.	De variis vocabulis Geographicis.	28.
Caput V.	De Globi terraquei divisione.	31.
Caput VI.	Divisio aquarum.	32.
Caput VII.	Mappa Geographica Europæ.	35.
Caput VIII.	De 9. majoribus Europæ partibus.	40.
§. I.	De mappa Geographica Imperii Germanici. 40. Circulus Austriacus. 44. Bavaricus. 48. Sævicus. 50. Rhenanus Superior. 53. Rhen: inferior sive Electoralis. 55. Westphalicus. 56. Franco-nicus. 57. Saxonix Superioris. 58. Saxonix Inferioris.	60.
§. II.	De magna Peninsula Scandinavia. 61. Svecia. 61. Norvegia. 62. Dania. 65.	
§. III.	Moscovia. 66. §. IV. Polonix Regnum. 68. §. V. Turcia Europæa. 70.	
§. VI.	Britannia. 72. §. VII. Italia. 74.	
§. VIII.	Gallia. 76. §. IX. Hispania 79. Lusitania. 81. Hungariæ Regum. 82.	
Caput IX.	Octo minores Europæ partes. 83.	
§. I.	De 4. Regionibus Galliam inter & Imperium Germanicum &c.	83.
	Belgium. 84. Lotharingia. 86. Helvetia. 86.	



tia 86. Sabaudia.	- - - - -	88.
§. II. Quatuor reliquæ Europæ partes Po-		
loniam inter & Turciam Europæam.	- - - - -	88.
Transylvania.	88. Valachia & Moldavia.	89.
Tartaria minor.	- - - - -	89.
<i>Caput X.</i> Mappa Geographica Asiæ.	- - - - -	90.
§. I. Turcia Asiatica,	92. Anatolia.	- 92.
Syria.	94. Arabia	96. Georgia.
- - - - -	- - - - -	97.
Armenia sive Turcomania.	- - - - -	97.
Diarbechia.	- - - - -	98.
§. II. Reliquæ Asiæ partes.	98. Persia.	98.
India.	99. Tartaria Magna.	102. Sina.
- - - - -	- - - - -	103.
<i>Caput XI.</i> Mappa Geographica Africæ.	- - - - -	103.
§. I. Superior Africæ Pars.	- - - - -	105.
§. II. Pars Africæ inferior, sive Æthiopia.	- - - - -	107.
§. III. Africæ Insulæ.	- - - - -	108.
<i>Caput XII.</i> Mappa Geographica Americæ.	- - - - -	108.
§. I. America Borealis.	- - - - -	110.
§. II. America Australis.	- - - - -	114.
<i>Caput XIII.</i> De Regionibus incognitis.	- - - - -	114.

Omnia ad Majorem
DEI Gloriam.



etur)

i-

ata.

is.

nae.

ana

qui

ui-

ur,

uū.

e de

P.

50.

Libria Jagiellońska

Biblioteka Jagiellońska



stdr0022057



